



JUNE 2024

VOLUME 64 | NO. 06

Khristian Thukizakna



“
Midik amah muanhuaina a om,
amah nung in a tate a hampha uhi
”

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulia

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

Lakman:- Kum khat ₹ 150.00;
Dak ah ₹ 200.00; **Bu khat** ₹ 15.00;
Gamdang US\$ 20.00

CONTENTS

1. EDITORIAL	: 01
2. PA MANPHATNA	: 03
3. NAUPANG SUNDESKUL	: 06
4. SAPTUAM SUNG KIPUMKHATNA	: 11
5. NUPA HINKHUA NUAM LEH DETDOU	: 14
6. BIBLE STUDY	: 18
7. GAMMIAL AW	: 23
8. DORCAS CORNER	: 28
9. YOUTH CORNER	: 31
9. CHILDREN'S CORNER	: 34
10. EBC INNSUNG THU	: 35
11. THU TUAMTUAM	: 37
12. KIPATHU GENNA/ THUMNA MAKAI	: 38

Thusuah ding piakna:

Editor,
 Khristian Thukizakna
 Dorcas Hall, P. O. Box - 6,
 New Lamka,
 Manipur - 795006, India.

*Thusuah sung-a kigente
 Evangelical Baptist Convention
 Saptuam ngaihdan ahi kim kholkei.
 Thusuahte'n amau thusuah ah moh a
 pawtek ding uh.*

SAPTUAM SUNG KIPUMKhatNA

*Pa Siangthou aw, nang kei na hon piakte na min in hum in, **pumkhat** ahitheihna ding un, eimah pumkhat i hih bang in (Jn 17:11).*

Toupa Jesu' thumna gingtute pumkhat a hihna ding uh a hihlaini Saptuam tangthu i sim leh saptuam a kipumkhat louh dan a kimu hi. Saptuam a kipumkhat louhna ziaak tampi om ding hi. Mi khenkhatte'n saptuam pawltuamtuam a kikhenzak sek naktakin adem uhi. Khenkhat in lah kikhenzak Pawl a tel utlou in independent in a ding ua, khenkhat lah free church akichi ua, Bangteng hileh pawl na tuambawl ahi thouthou uhi. Toupa Jesu'n leng dawimangpa'n saptuamte khenzak sawm ding ahi chih thei a *pumkhat* a hihtheihna ding ua Pa kiang a ana thum ahi ngei ding in igingta hi.

Misiamte'n saptuam chinih in *Muhtheih* leh *Muhtheihlauh* in akhen uhi. Muhtheihlauh saptuam pen leitung khua vannuai a Jesu Khrist gingta tengteng kigawmkhawmte saptuam diktak ahi uh achi uhi. Muhtheih saptuam bel tualsung a om Biakin khat a kaikhawmte ahi uhi. Muhtheihlauh saptuam bel koimun peuh a om gingtu Pathian ta tengteng genna ahi a, muhtheih saptuam bel salam a pawl tuamtuam a kikhen tiltel gingtute ahi uhi.

Tua Saptuam kikhenzak igen pen muhtheih saptuamte laka thil om gen ihi. Saptuam bel Jesu Khrist Suangpi tung a kilam gingtu mimalte ahi uhi. Tua Jesu Khrist ginna ichih pen Bible Thutak toh kituak thugin (doctrine) ahi. Saptuam a telna dingin kisika Jesu Khrist gintak ding ahi. Tua ginna adik leh diklouh tehna Laisiangthou ahi. Huaiziakin Laisiangthou pomdan leh khiakdan akibatlouh chiang in pawl kikhen sek ana hi ahi. Ahihleh Bible pom chiatchiat akuate dik a akuate diklou hiam chih mi khenkhat a din buaihuaipi asuak hi. Evangelical pawlpiten bel Pathian hehpihna ziaka a Jesu Khrist gintakna keulu Pathian maia I siamtanna omsun ahi, a pawlpi ah hotdamna aomkei achi uhi.

Huchi ahihleh doctrine pen kikhenna omsaktu ahi ve maw chih theih khat hong suak dek hi. Hiai ziakin mi khenkhatte'n doctrine

igen chiangin kituahlohna atam doctrine genloh ding ahi achi uhi. Ahia, hiai chiten doctrine kichi thiltuam khat a koih a biakna, phatna, thumna, thlpiak, Pathian, Jesu, hotdamna, Kha Siangthou, ichihte doctrine hilou dana ngai uh ahi diam kitheilou hi. Tua etsakna ingente doctrine bulpita hi zaw uhi.

Etsakna dingin, Roman Catholic pawlpi apan Protestant pawlpi hong piangkha hi. Martin Luther in 1517 kum in Roman Catholic pawlpi diklohna thugin 95 agelhkhiak thu ah German vaihawmna Inpi a asap lai un “Ka thugin adiklohndan Bible pansan leh ngaihtuahna chimtak toh non selthal theih uleh ka laigelh mei ah ka haltum ding” chi a a chou laia a selna ding a theihloh uh ahi. Huai thugin tung a kingate evangelical pawlta ahi uhi.

Huai ziakin etdan khat ah ahoih zaw ding a kikhenna leng ana om thou ahi. Etsakna dingin, Methodist pawlpi ana kiphut kei henla, Moravian Church kichite ana piangkhelou himaizen leh leitung pumpi Tanchinhoih genzakna tua sang a kum za bangzah hama zekai zaw lai maithei ahi. Kikhenna ahoih chih sawm i hikei a, himahleh ahoihlou akipan ahoih zaw ding a kikhenna a om leh tua Pathian deihdan hithei hi (2Kor 6:17; Nas 15:39). Himahleh, kikhenna tamzaw Kha Siangthou makaih leh Laisiangthou sinsak thu ziaak leng hilou, kihazatna, kimuhdahna, makaih ut ziaak, ki thupisak ziaak khawnga kikhennate, kikhenna omsaktu ahihloh ding ahi. Saptuam tawm lua, hoihtaka leng function zoulou, naupang Nipi Skul le neizoulou, Pastor le guaizoulou, missionary le sawl zoulou, tawmchik mahni thuzoh teng siatloh zen a ukkhum khak ding leng kivenhuai mahmah ahi. Tuaban ah, Pathian saptuam toh politics peuh mekmat a, leitung vai sim taka beh leh phung min khawnga saptuam pawl kibawl khawng pilvanhuai ahi. Pathian min thupina ding leng hilou, memberte khalam a keppiching ding veiluat ziaak leng hilou, lai siamna degree neih man hiam, foreign support delhnop man khawng a saptuam puh mahmah loh ding ahi. A omsa saptuam kipumkhat sak ding in kingaihniamna, thunuaulutna toh itna a kithuakzou kawm in saptuam I kem ding uhi. ■

Pate Nipini Message
PA MANPHATNA

- Rev T Paununsang, *FS Dhemaji Mission Field*

Khovel a piangkhe peuhmah pa (suangtu) neilou ki omlou hi. Pa omlou in mihing kuamah kipi pang khe theilou hi. Huaiziak in i Pa tuh i hinkhua a dinga poimoh chih kia hilou in i kipatna i pa mah ana hi ngitnget hi. Vangtahna ziaka pa mel mu khalou i chihte leng pa nei hi veve uhi. Huaiziak in tuni a pa hihna ana tangta te leh pa dinmun ana lente peuhmah zahtak tham ching leh pahtawi tham ching sa in zahna sangpen ka pia hi.

Pa chih thumal i zak chiang in humbittu ahihna uh bang leng hon ngaihtuah sak thei hi. Ta peuhmah in i neulai hun in i pate chiat kisuang mahmah a, hatpen leh thupi pen ding in kingaih sun hi. Lawm leh vual lak a ivuallelh ni khua in leng “ka pa kiang kon gen ding” chi in i pate kisuang mahmah hi. Huaiziak in Pa omlouhna innsung pen thawmhau in midang in leng maingal ua, a zi leh tate leng vuallelh leh thawmhau kisa in omkha theizel uhi.

PATE ITNA LEH DEIHSAKNA
 Khosakna leh nekzonna tuamtuam ziaak a dinmun kibatlouhna khovel a om ihihman in pa chiatchiat leng dinmun kibang hetlou hi. Khenkhatte pate laisiam mahmah omlai in pa khenkhat laisiamlou leng tampi omkha thei hi. Pa khenkhat Sum-leh-pai hau a innsung a zi-leh-tate deih teng leisak zou ahihlai un pa khenkhat in niteng a zi-leh-tate’ nek ding suktuah lel ding le haksa sa ki om thei hi. Pa khenkhat lah pil mahmah

tate maban ding teng a pi a lamlah zou om a, huchihlai in pa khenkhat tate pii dingdan tuan theilou leng ki om hi.

Hiai bang teng ahihman in tuni a i gennop poimoh mahmah ahihle, na pa’n na deihteng hon leisak zohlouh a, na maban ding hong lamlah theih louh hang in; Pa amah tate deihteng leisak zou leh khosak ding dan gelpih zou pa laisiam mahmahte bang in na pa hon deihsakna thupi in lian veve ahi chih taten i mangngilh louh ding uh ahi. Mi pate bang

a nang pa'n hong duat zou lou leh ngainalou nasak khak leh huai dan hilou thei ahi. Hithei hileh na pa'n leng mi pate bang a inn hoih a hon tenpih nuam, gari hoih a hon taipih nuam leh na poimoh teng hon leisak nuam lua ahi chih theigige in. Huaiziak in, paten hon itlou leh deihsak lou i sak khak pen a dinmun in tua ding a zoulou hikha thei ahi zaw a, na pa pen pa hehpih huailua hi zaw thei hi.

Na pa lungtang nasak kha lechin leng nang itna sang in na pa hon itna lian zaw gige ahi chih thei in. Laisiangthou a i muh bang in Absolom in apa dou in thahsawm a bangteng hih mahleh a pa David in Absolom it veve hi. Kidouna a atapa Absolom a hong sih tak in "Absolom, Absolom ka tapa nang sih sang in kei na pa si hi zaw leng maw" chih in kahtam lou hi. (2 Samuel 18:33).

PA A HAT NAWN LOUH CHIANG IN

Tuni'n innsung ah na pa hatzou nawnlou bangmah semkhe zou nawn lou ahi maithei hi. Himahleh i theih ding ua poimoh ahibleh tuni a pa tekta leh hatzou nawn lou pen hiai

dinmun a ana om gige hilou ahi. A hat hunlai, a bawl theih hun lai leh a diang vetvet hun leh a kizen hun ana om ahi chih i mangngilh louh ding uh ahi. Ei a tate bang leng hon pom a, hon pua a akhut langkhat a leng hon dopkang vetvet lai hun leh iduh-ideih leh poimohte hon leisak leh piak zoh hunlai ana om ahi chih i phawk gige ding ahi.

Tu chiang a poisim khat ahibleh Nu-leh-paten atate uh tai ngam nawnlou, zep ngam nawn lou, naupang khat hinkhua hong kise leh nu-leh-pa ngoh ding dan a ki om, hong kingaise leh nu-le-paten mohpuakna zoulou chi-a i society leh mipil tuamtumten mohsa ding ki bangta mawk a ngaihtuah tham ching mahmah om hi.

(Niteng siamsinna School lam bang ah leng sinsaktu teacher ten naupangte deihbang a discipline ngam nawnlou chihdan in kipai mawk ding banga poi mahmah hi. Huaiziak in, teacher khenkhat a ding in haksatna om ding hong bang mawk hi).

INKUAN A PA MOHPUAKNA

Pa (suangtu) na hihman in na innsung a na mohpuakna leh poimohna kuamah in hon

khekkhiat theih mawk hilou hi. Nang sik-leh-tang a ding ding na innsung a omthei lou ahi chih thei inla na innkuan poimoh ngaih pen in nei in. Na hihtheihna tan in na tate ompih inla amaute toh hunzat khawm dan kizil poimoh ngaih mahmah in. Tate toh pawtkhawm kimawlkhawm chiamnui khawm chihte nidang deuh in zumhuai dan in kingaisim khamawk a, huai ding hizaw lou in tua bang a hun zatkhawm chihte i hih tuak lua uh ana hi zaw hi.

Zi-leh-tate bang in leng pa in hon dampih lai a apoimoh lam theikha lou ihi kha thei hi. Pa poimoh ahihna innsung tampi te ahon sihsan chiang un ki phawk khe san hi. Huaiziak in zi-leh-tate bang in leng innsunga ka pa'n hon taitai, gilou lua chi-a ituam koih khak ding uh pilvan huaipi khat ana hikha thei hi. Pa in inkuan a a mohpuakna kilawm leh hoihtak a asepkhiak theihna ding a insung a a tenpih miten nakpi mahmah a a nungthuap kul gige hi.

INKUAN A PA HOIH MANPHATNA

Pa hoih nei leh neilou inkuan leh insung pen kikhai in

kilamdang mahmah hi. Mi pahoih neikhaten a tate uh makhua ding gelsak in thilbangkim ah makaih in sinsak uhi. Tua bang pate, a tate uh khamuang in tawldam tak in khosa ua enhuai mahmah uhi. Pa a hoih louh chiang in insung mite mah in kithuak kha pen ahihman in poi mahmah a, inkuan niamkiakna hontun in tate leng khan leh vual lak a maizum in hinkhua zang uhi.

Pa hoih na hih leh na inkuan in tulel a na dinmun ua pan kalsang suantou na hi dinga, Pa hoihlou na hihkhak zenzen leh bel na inkuan un na tulel dinmun ua pan a kesuk lellel na hi ding uhi. Mi insung a hoih vahih sang in mahni insung a pa hoih ngaihsang huai zaw a, mundang a maitai tak a va houlim sang in ei insung a maitai leh houlim siam manpha zaw hi.

I gam leh insung in i poimoh leh taksap lian mahmah ahihleh Pa hoih ahi. Huaiziak in pa hikha tengteng in pa hoih hiding in pan lathak chiat in, zi leh taten leng i pate chiat uh pa hoih a hihtheihna ding un nungthuap chiat sawm ni. Simtute tengteng Toupan hon vualzawl hen...! ■

Naupangte' Nipini

NAUPANG SUNDESKUL

- Rev M Ginminthang, *Child Coordinator*

ASaptuamte Toupa'n a it a, a vualzawl a, chit louhna tampi nei mah lehang, Ama min in nna poimoh tuamtumte hon semkhe sak zel hi. Tua nna poimoh mahmahte lakah khat tuh Naupangte khalam a kepna nna ahi. Hiai nna a poimoh dan tampi gen louh in leng i Toupa Jesu Khrist thugen ah chiang mahmah hi. Aman "Naupang neuta ka kiang ah honsawl unla, khamkei un; van gam hichibang mite a ahi ngal a" (Matt. 19:14) a chi hi. Jesu Khrist toh ki sukha thei ding a amaute a khebul i tut ding tuh i moh puak ahimai hi. Tua banah Saptuam maban leng amaute tungah kinga ahihman in poimoh ngaih ding ahi. Methodist Bishop khat in "Sundeskul tawpsan hileng Methodist Saptuam kum 15 sung in a bei ding" ana chi hi.



SAPTUAM SUNDESKUL:

Tulel dinmun et in, Saptuam in naupang kepna awlmoh ihihdan lam chi tuamtum ah kilang thei zel ahihman in kipahhuai i sa mahmah hi. I Sundeskul building hoih taktakte leh naupangte a ding a khalam kikepna program tuamtam i neih touh zelte tungtawn in Saptuam in naupangte i awlmohna muhtheih in om hi. I Saptuam heutu masate'n leng naupangte lak a Pathian' nasepna na ngaipoimoh in, i Saptuam dinkhiak ma natawmm inleng naupangte' lakah nasepna ana

kipanta hi. Tu dinmun ah EBC local Saptuam chih phial in, naupangte' khalam a kikepna Sunday School kineithe chiat ta ahihman in honpi i biak Pathian min i phat hi. Kum 2022 census report dungzui in EBC pumpi ah Naupang sinsaktu 1,408 om a, naupang minkhum zah 16,204 vel omzou hi. Toupa min phat in om hen! Pathian piina leh a vualzawl na ziak in Naupang a neu a kipan hoihtak a Sundeskul ah ana kaitou thei i chihte zaw, Toupa'n hon kepbit sakna ahi. Tutung Naupangte' nipini hun ah, naupangte' awlmohna ziak a i Saptuam

heutu masate na panlaknate tamlou enkik thak in, mailam ah thupi zawsem in sunzom tou lehang chih deihhuai isa hi.

EBC SUNDESKUL HONG KIPATDAN:

Manipur singtanggap ah Tanchinhoih hong lut toh kiton in i heutu masate'n lam tuamtuam ah veina, awlmohna nanei uha, hihtheihkhomkhom in Pathian' gam nasepna ana pantou uhi. Naupang lakah leng a department chiah om naikei mahleh Kum 1933 in Mr. H H Coleman in Pastor Kaineng kiang ah Child Evangelist nasepna guan in children ministry ana kipan tou hi. Kum 1947 in Pu Siamkung leh Pu Tunvum, Mission compound a omte makaih in Young Christian Advance Rally (YCAR) dinkhiak in om hi. YCAR Khawmpi masa pen Lamka Tung ah 1949 kum in kinei a, Lamka-te mah in kipahman in "Sankey bu" la uhi. YCAR kipahman la masa pen ahi uhi. Saptuam in hiai nasepna hoihsa in kum 1950 in semtu ding Evan. Langpum la in theihpihna pia uh a, huai tuh tulai a BCD i chih hong kipatna ahi leng chih theih hi. Convention a dinkhiak tunglai in committee tuamtuam

akinei/aom pah kei a, Standing Committee in a kop vek mai hi. Himahleh, hun hong pai zel ah huchimai theilou ahihdan theikhia in kum 1954 in Sunday School Committee phuhkhiak in om hi. Chairman ah Rev. Nengzachin, Secretary Rev. Siamkung, Member Rev. Englian, Pu Vungthuam leh Pu Vaikam hi uhi.

Amaute'n piching lam leh naupang lam saikhawm uh a, Committee leng hon keklian in Pu Taivel, Pu Khamkam, Pu Pumzachin, Pu Liankhohau leh Pu Laljem-te toh Evangelical Literature Committee hong hi uhi. Lai lam himhim amau khut ah kinga hi. Tua toh kiton in 1966 apan in Lushei pau kizang nawn lou in ei pau kizang panta hi. Sunday School result average sangpen Dialkhai khua in Mr. Gouchin Memorial Cup ana la uhi. YCAR sung ah napangte kia hilou in, tuailaite toh ana omkhawm tou ngitngat himahleh 1965 in Khristian Tuailai Pawl (KTP) chih kiphut khia a, YCAR sung ah naupang lam kia omta hi. 1966 in YCAR Director ding in Pastor Khamkam guan ahi a, kum 1971 – 1972 sung in Teacher's handbook, Naupang heutute panpihtu ding laibu

bawlkhiak ahi a, tuate zang a naupangte khalam thute sinsak ahi uhi. Kum 1973 in YCAR Khawmpu beisak ahi a, hiai kum tan in khawmpu 24 vei geih kinei man hi.

YCAR min a khawmpite om nawnlou himahleh Naupang Pawl chi a kiminvoh in Pastor bial chiat in Naupang Khawmpu kinei thei zel hi [1974 – 1977]. Pu Liankhosiam DS Tuivai in Child Evangelism Director nna lenkhawm in, Mr. H Tunzakham in KTP Secretary leh Naupang Pawl Secretary alenkop hi. Kum 1977 in Sunday School ah CEEFI subject zat pat in om hi/kizang pan hi.

Kum 1978 Khawmpu lian in, Rev. Nengzakhai Director of Child Evangelism in aguang hi. Huaikhit a kipan Saptuam in naupang lam a sem ding heutu tuamtuan ana laktouhte uleh thiltung poimoh khenkhatte hiai bang ahi.

- 1981—Standing Committee in Director Child Evangelism ding in Mr. V. Pumkam aguang hi.

- 1990—Assistant Director of Ministries ding in V. Jamkhanthang guan in om a,

aman Children Department lam mohpuakna a lenkhawm hi.

- 1991—Dorcas Worker Miss Liankhoman in Child Worker nna toh alenkop hi.

- 1993—KNP Heutu Seminar leh khawmpu kithuah khat veina bial pumpu huap in Lamka Tung ah kinei hi.

- 1995—Khawmpu lian in “Naupangte Kum” chi in puang hi. EBC Saptuam pumpu thupi ding in “Thou inla naupang phong in” Genesis 21:18 chih kizang hi.

- 1996 – 2001—Child Worker sem ding in Mr. L Vungzamuan DPC tungtawn a lak ahi.

- 2001—BWA leh APBF kizomta, Kristian Naupang Pawl pen leng Baptist Children Department chi in hong kikheng hi.

- 2002 – 2004—Heutupa H Vungkhai in Rev. C V John sponsor in Child Worker hon sem a, kum 2003 in EBC in Contract Basis in sem zomsak in, akum nawn in appointment piak in om hi.

- 2005—1st June apat in Miss Grace Ngaihvung in BOT lemsakna bang in hon sem pan hi.

- 2009—Upa L Vungzamuan in Youth Coordinator toh

Child Coordinator nna hon lenkhawm nawn hi.

- 2010—DPC tungtawn in Lianding Guite Child Coordinator ding in lak in om hi.
- 2011—Partners In Discipleship-te Curriculum bangzah hiam kitawi pan hi. Naupang pawl Sunday School attendance registers ding kibawl a, kizangtou lellel hi.
- 2014—Suangmantam Late DVD cartoon toh kithuah kibawlkhia hi.
- 2017—By assignment in Rev. Chinkhengoupau in Child Co-ordinator hihna len hi.
- 2023—Rev. M. Ginminthang in by assignment in Child Co-ordinator hihna len in tuni chiang lentou lai hi.

Pathian ompihna thupitak tang in heutu masate'n amau hun chiat ah naupangte a ding a nna poimoh tampitak na semkhia uhi. Sinlaibu a hunhun a zattheih ding ana gelh zelte bang, Sunday School teachers training and orientation program tuamtuan na sai tou ngitnget in amaute hon sinsak bang in local chih ah naupangte sinsakna kipe thei zel hi. Naupangte ettheih ding Gospel music video-te bang

na bawl in tuni chiang in muhtheih leh ettheih tampi na om hi. Hun haksa, a biik in Covid 19 (2020-2021) kumte bang ah leng online tungtawn a naupangte sinsakna na pia in, pan nakpitak in na la uhi.

SUNDESKUL TULEL DINMUN:

Tulel dinmun in EBC Local Saptuam chih in Sunday School ki neih vek phialta hi. September 2022, census dungzui in naupang lam nasepna hiai anuai a bang in chiamteh theih hi.

- Naupang heutu omzah : 1,408
- Kaizah tangpi : 1,237
- Naupang minkhumzah : 16,204
- Kaizah tangpi : 12,598
- Naupang minkhumlou : 3,824
- Beginner A : 2,405
- Beginner B : 2,224
- Primary : 3,385
- Junior : 3,166
- Intermediate : 3,089
- Senior : 1,661

Amaute, Saptuam in abawl Sinlaibute zang in naupang heutute'n sinsakna Pathianni teng in pia uhi.

LOCAL CHILD EVANGELISTS:

Naupangte Khrist khebul a pi a Khrist batna a khansakna dia panmun poimoh leh vanzat manpha hihngei ding lametna

toh Local Child Evangelists chih Kum 2018 a patkhiak ahi. Naupang sinsaktute lak apan khat kiseh khiat zel ahi. LCE mohpuak ahihleh a poimoh bang a naupangte khalam leh hinkhua thu toh kisai houlimpih ding leh hotdamna thu puangzak ding ahi. Tu ate banah, local BCD in chialpina bang a saizoh leh hiai hunte a thugentu a zatding leng duhthusam khat ahi hi. Tua ding ngimna mah in LCE te sinsakna piak a, apoimoh bang a Headquarters in lamkaih ding chih ahi. Tu dinmun ah Local BCD tamzaw in amau Local Child Evangelists chiat kineih in, a poimoh bangbang in nasem zel uhi.

SINLAIBU PROJECT:

Tulel a nasep poimoh mahmahte lak a khat ahihleh Sinlaibu Project ahi. Hiai project poimohsakna hun sawtpi akipan ahita a, a nna tu in pai lallel hi. Pathian' panpihna toh tu in Beginner 'A' kum 1na, Primary Kum 1na leh Junior Kum 1na (Laibu 3) zohkhiat theih ding dinmun in omta a kipahhuai hi. Toupa'n hun hoih hon muhsak leh kumnawn 2024 akipan in a kituahpih pawlte'n hiai syllabus thakte tawi ta ding uhi. Pathian' pina lamem in

kum 2025 tan a hiai project zohsiang theih ding a ngim ahi.

BCD ALBUM PROJECT 2022:

Kum 2014 in Htp. Lianding Guite, Child Co-ordinator makaih in naupangte ettheih ding DVD album (Suangmantam) kichi na bawlkhia uhi. Manpha tak a zat ahihnung in adang bawl nawn ding lunggulh huai sa in project nakipan tou hi. Tu in laa bangzah hiam recording bawlkhit hita a, Sinlaibute zoh toh kiton a khahkhiak theih ding lamem in hiai project pai lallel hi. Naupangte Pathian phatna laate sakpih, sinsak kichi i ministry poimoh mahmah ahihna ah hiai project hoih leh gahsuahtak ahong hih ngei i lamem mahmah hi.

THUKHITNA:

A Saptuamte bukim hetlou himah lehang Toupa'n i sephak sunsunte hon vualzawl sak in gah thupi taktak hon musak zel hi. Huai mah tuh maban ah leng i lametna ahi gige a, tuabang ahih theihna ding in Local level ah, Division level ah leh Headquarters level ah theihtawp suah a pan i lak uh ngai ahih manin, tuabang hithei ding in Toupa'n hon ompih chiat hen. ■

SAPTUAM SUNG KIPUMKHATNA

- Rev Dr. S Vung Minthang, *General Secretary, EBC*

Huaiziak in, noute sap a na omna uh toh kikhom a khosa ding in kei Toupa a hentapa in ka hon ngen hi. Kingaihniamna leh migitna tengteng, kuhkalna toh, itna a kithuakzou chiat in, lemna Kha a kipum khatna vom tinten ding in (Eph 4:1-3).

Hiai thupi pansana i houlimna ding duhthusam ah pan leng ka chi hi. **Duhthusam khatna:** Manipur simlam a teng ei singtang mite NEIG Mission nuaia ana omteng saptuam khat a omkhawm thei hi maizen leng bangzah ta in khalam salam ah i khangtou di ua aw! Etsakna dingin budget crore 100 bawl thei ding ihi ua, akimkhat missions ah peta leng le crore 50 a i saptuam leh i gam puah thei ding. Siamsinna ah college leh University tanpha tungkhe zou ding ihi. National leh international ah Pathian mizatte thugen siam, lasak siamte a dingin khovel pawl lian pipite toh kikim in nna i semkhawm thei ding uhi.

Duhthusam nihna: Southern Manipur singtang mite saptuam pawlpi khata omkhawm ding gen sese le ngailou ichih leh a gintakhuai zodeuh hiai om hi; Pau kibang teng beek saptuam pawlkhat ah om leng khalam gen louh salam ah leng tua sang in i kipumkhat in i khangtou zo mahmah ding hi. Bible kibang, labu kibang, tenna mun kibang, beh kibang phet lou inkuan khat, unau khat, Toupa khat, ginna khat, baptisma khat, Pathian khat. Hileleng eite pawlneu chikchik a kikhen teltulte ihi uhi. I gen banga doctrine tuam le hilou pawl neuchik a om

ut chih tuh i lungsim uleng neu deuh mah ahi diam chih in om hi. I singtang khuate uh neu deuhdeuh, saptuam lah neu deuhdeuh, i hihtheih tawm deuhdeuh, thu-le-la tam deuhdeuh, kituaklou deuhdeuh chih tuh i lampi zuih uh ahi. Manipur a teng chiatchiat unau Hmarte, Nagate khawng singtang ah a teng depdup lai ua, Mizogam leh Nagaland khawngte'n a singtang khuate uh nuselou in apuah zaw uhi. I maban uh bang ahi dia le? I gennop hiailamte ahi tadih kei a Laisiangthou gen kipumkhatna ahi.

Laisiangthou sinsak thugin dik gup ziak a atuam a omna bel Bible in leng hon hawnthawn mah ahi (2Kor 6:17; 2Jn 1:10). Huchi hilou makai hih ut ziak, heutute kituahlouh ziak, foreign support lung gulh ziak, saptuam sung thudiklou neu chikchik khawng tawilian a pawl dang phut chihte thil poitak ahi. Saptuam omsa keksakna dia behpai sim, sum paisim (nonglut leh kon chawmsak ding chihte), nam pai sim zomah chihte om theih ahi. Saptuam neuluat ziaka naupangte Nipini skul leng ginataka hih zoulou, khangthak Bible zouthak, laisiamte leng nna ding leng pezoulou, missions awlmoh banlou, mahni kisikhop, haksa salua saleng lah a pawl adia sih ngap phial chih bang leng om thei hi. Mikhat achiamnuh sim thugen ka za a “kou lam chu mundang ah Bible ava zil ua saptuam khat toh hong tung zel uh” achi hi.

Hiai Ephesa laikhak a Paul in kipumkhatna a gendan hoihtak a i sui leh lamdang sak theih ding khop a thupi leh thu hausa ana hi ahi. Kipumkhatna kichi Paul in amuhsuah ahikei a Pathian tangtawn lemgel ahi zaw hi. Kipumkhatna toh kisai a suangphum Bible in hichiin

agen hi: i) Pathian hun seh atun chiang a van a omte leh lei a omte Khrist a gawmkhawm ding (1:10), ii) Huai hih thei ding a thil hihtheihna bukim Pathian in nei ahi (1:20,21), iii) Khelhna ziak a kisesa mihingte leng i kipumkhat theihna dingin Pathian in Khrist ah hon siamthak hi (2:8-10), iv) Jesu Khrist a siamthakna in Zentel leh Juda hon gawm a, pumpi hiangte, thuchiam tanpihte dingin a hon gawm hi (3:6).

Paul in, kipumkhatna Pathian tangtawn thilgel ahihdan hon pholhkhiak khit in Ephesa a gingu omkhawmte leng tua Pathian tangtawn thilgel hih tangtung ding a sap ahihdan uh bung 4 ah hon genchian hi. Paul in tua kipumkhatna atak suaksak ding a “sap a om” na hi uh chi hi. Tua Pathian sapna hih tangtunna dingin thu poimoh mahmah Paul in gen hi.

Kipumkhatna ding a kalbi masapen kingaihniamna ahi.

Hiai tuh mahni bangmahlou a kisim theihna ahi. Jesu'n kipumkhatna semdia a hong kipiak laiin hong ki “awng sak” chi hi (Phil 2:7). Amah leh Amah kihihdim lou in midangte ading leh leitung pumpi a mikhialte

adingin kitei awnga, chilphih leh bawlsiatnate thuak napi in “Pa, amaute ngaihdam in” chithei hi (Lk 23:34). Saptuam sung leh saptuam polam ah leng buaina om peuh leh kingaihniamna kitaksap ziak ahi vek phial hi. Kithupisakna, kiletsakna, midangte muhsitna omna ah kipumkhatna om theilou hi.

Kipumkhatna kalbi dang khat migitna ahi. Migitna kichi migilou toh kilehbulh lungput ahi. Eipau in Nunnemna leng akichi hi. Tulai khovel hiamgam adim lakah nunnemna kichi dawilokna, mi phak zohlouhna bang a ngaihna mi khenkhat in anei kha thei uhi. Himahleh mi hangsante kia nunnem ngam uh ahi. Amah zongte kiang a kua ahia nazon uh achih laia “Nazareth Jesu” achihlai un leng “Kei mah ka hi” chi a maituah ngam dia thunuilut Jesu ahi (Jn 18:5). Tulaia leader mi ngaihsangte tuh, mi huham, ngongtat sim, hih phutphut ngam, zuau leh tak thuah siam, akul leh sisan suah ngam ding, tuate kithupingaih hi. Jesu hunlaia Judate’n leng tuabang makai adeih ziakun Jesu nunnem deihlou a Barabba a deih zaw uhi (Mk 15:11).

Aban ah itna a kithuakzohna in kipumkhatna bawlkhia hi. Saptuam sung ah mi tuamtuam ngaihdan tuamtuam neite ki-om khawm hi. Tua kibatlouhnate itna toh kithuakzou tuah chiat a gingtute aom chiang un kipumkhatna mel kilawmtak dawk thei pan hi. Tulai digital hun tuh thuakzohna, ngakzohna om nawnlou toh kibang ahita. Tuabang migitna nunnemna leh thuakzohna a omna pawlpi sung ah kilemna leh khamuanna in vaihawm chiin Paul in gen hi (4:3). Paite Laisiangthou (BSI) ah “lemna Kha” chiin kilet kha a agennop pen bel lemna leh khamuanna toh kigakkhawm pawlpi sung ah Kha pen khat ahihna kilangkhesak un, a chihna ahi. Huaiziakin, inkuan sung hi in saptuam sung hitaleh ‘I kipumkhat uh hia?’ chih dot masak ding hilou in, mi nunnem, thuakzou, leh itna toh khat leh khat kipomsiam tuabang mi a om hiam chih kidot ding hi zaw hi. Tuate omlouhna ah kipumkhatna kichi piang theilou ding hi. Hiai thu simte kingainiam, nunnem, leh itna a thuakzohna nei tek dingin hon vualzawl hen. ■

NUPA HINKHUA NUAM LEH DETDOU

- Pastor N Pumsuanmung, Local Pastor, EBCC Aizawl, Dinthar

Thumakai: Khovel a kivaihawmna laklak ah innkuan ki vaikhawmna a upa pen a, huai ah Pa masapen Adam ahi. Laisiangthou Bupi nupa kopkhat kitenna(huai tuh Adam leh Evi) a pat in a om a Kris leh a saptuamte kitenna a zawh in a om hi. Pathian in kiteenna tungtawn a hong piangkha Innkuan a poimawhna leh thupina kilatsakna ding in Genesis apan Kilakna sung ah innkuan hoih leh hoihlou tampi ahon lak hi. Khelhna leh puksiatna innkuan khat apan hong kipan ahih bang in halhthakna leh kitungding thakna kichi innkuan sungmah nupate kal apan a ahong piankhat ding kism hi. Tutung in Nupa hinkhua nuam leh detdou bawlnding a poimawh Laisiangthou toh kituak bang hihiam chih thu kikumkhawm leng ichi hi.

Nidanglai sang in tuhun in i lak ah nupa kikhenna a tamzawta hi. Sakhua leh gam leh nam vai ah i kip a i masawn taktakna ding in Pathian deihna bang a innkuan kikepna leh inupa kal hinkhua mah i limbawl ua i poimawhngaih mahmah ding uh ahi. Gam changkang leh i thupingaih mahmah uh USA leng tulel in “Pa neilou gam” chih in a omta hi. Gam khat leh nam khat a hatna uh tuh a sung ah innkuan bang chibang aom a chih ah kinga ahi. Huchimah bang in saptuam hat leh hatlou leng a sung a innkuan omte ah kinga mahmah ahi. “Nupa kithutuak, khokhat in zoulou” chih paunak khat a om hi. Tulel a i gam inam leh saptuam in ipoimawh lianpen

uh tuh innkuan hoih leh detdou ahi. I nasep leh nekzonna ah lawhching kisa in khangtou mah lehang i innkuan kepna leh i nupa kal a i lawhsap leh i lawhchinna pen a kimkhat lel hiding ahi. Engstrom in, “Na nasep leh na thilhihten na innkuan toh a hon kikhensak leh na mawhpuakna lianzaw a lawhsam na hi” ana chihial hi.

KRISTIAN NUPA

Kristian nupa kichi gingu pasal khat leh numei khat Jesu Kris kiang a kipe masa tuak a, Bible in nupa hinkhua ding a agel nupa ki-itna, kisuklungkimna leh NU leh PA hiding a kisakkholhna hoihtak neikawm a innkuan kipumkhat bawlkhiak ding a thiltup poimawh pen ahi. Pasal khat leh numei khat nupa(zi leh

pasal) bang a ahong omkhawm Chiang un suan leh paak nei ding kia a omkhawm leh kiteng ahikei uhi. Kris leh a Saptuamte itna ziaak a kizopkhawmna leh kipumkhatna genkhiakna ahi (Paul). I pu leh pate uapan nupa kikhen ding deihlou minam i na hikha uhi. Himahleh i kikhenlouhna ziaak uh Laisiangthou toh kituak vek ana hikhollou hi. Nupa ahitheitan a kikhenlouh i tup uh ahoih a, himahleh kiteng hingal a nupa kal a ki-itna leh kingaihna omlou a buangnai hai toh kibang a aomtheih ahihman in pilvan ding ahi.

Kiteng hingal a pasal lungkim theilou, zi leh tate bawl genthei gige pa hihkhak theih ahi. Sunggil lam a a hihliam a om natnate dam taktak loup i leh kilemna taktak omloupi a inndongtate hahpanna ziaak khawng a kinupa hamham bang in leng omtheih leh kilawm hi. Tuabang nupate kal ah ki-itna, kingaihna, kihepihna leh kiduatna chihthe om nawnlou in tate khankhiakna ding innsung bouruak nakpitak in a suse thei hi. Nupa kituahlouhna a thuaknasapen tuh nupate sang in a atate uh ahi zaw hi. Nupa kina gige insung tuh bang chibang in a innthupi mah leh a tate ading in innnuam

ahitheih ngeikei hi. Nupa damkhawm napi a tate tagah bang a kingakna ding neilou a om a zite meithai toh kibang a khosa sak pa hihkhaktheih ahi. Innsung pen zi leh tate ading a bitna leh muanna a ngahna mun ding uh ahih lai a gallau bang a thawmhau tak a omsak khak theih ahihman in pilvan ding ahi. (Na om louh Chiang a na zi leh na taten nuamsa zaw ahikha hiam). I tate poimawh masapen zaw nupa hinkhua kiptak leh chidam tak nei nu leh pa ahon neihding uh ahizaw hi. Inn hoihtak ah i tengsak zou kei maithei; motor hoihtak i leisak zou kei maithei; khovel a thil manpha taktak i neisakzou kei maithei; a lim a al i nekpah zoukei maithei; HIMAHLEH innsung a nupa hinkhua chidam leh ki-itna leh ki hehpihtuahna a om leh khovel a mihampha penpen a suak thei uhi (Pau.17:1). Inn thupi taktakte SUM a lam ahi a innsung nuam bel LUNGTANG sung a kipan a bawlkhiaak ahi.

KI NUPAT DAN Toh KISAI

Numei khat leh Pasal khat tengkhawm, khosakhawm, hinkhua zangkhawm a pumkhat a a hong om khawm Chiang un “NUPA” a kichi hi. Laisiangthou a imuh bang in nupa kichi tuh sapum tuamtuak sapumkhat suahna ahi, “...

huchiin sakhat a hong hita ding uh. Huan, Adam leh a ji a nih un vuaktangin a om ua, a zum tuan kei uh” (Gen. 2:24-25). Nupa hihna in tanvou thupitak ,kipahna leh lungdamna banah mawhpuakna liantak toh kizui ahi. Nupa tampiten a amau mawhpuakna sang in a lawm (partner) mawhpuakna kia thei kitam mahmah hi. Tua in kimawhsakna toh kidim innsung piangkhe sak a, nupakal ah kipahna leh lungkimna tun thei ngeilou hi.

Nupa Hinkhua lawhching neihtheihna dia poimawhte:

Ki-it ding: Ei mite atangpi a i kitenma in kingai/ki-it ua i kitenkhit Chiang a kining pahtheite ihi uhi. Laisiangthou deihdan takin tuh kitenma a ki-it ding hizawlou in kitenzoh Chiang a ki-it ding hizaw ahi. I nungak i tangval lai bang a iki-it semsem ding ahi. I zitemah/ ipasalte mah i it leh nuampen ahi. (Itna mitdel & Itna mitkeuh). Paunak khat in , “Itna chikhem a bang hiam kilamdanna, hoihlouna ahong om Chiang a ki itlouh zelpen itna hilou hi,” achi hi.

Lumkhawm ding: Pathian in atung a kipan a zahmawh abawl in pasal khat leh numei khat kaal a ding, nupa kal kia a zatding a apiak, Ama min thupina ding a

abawl ahi. Nupa lupkhawmna a Pathian thiltup tuh – chisuanna ding (Gen.1:28), nopsakna ding (Pau. 5:18-20; Sol. 2:3;3:1-7), Kris leh A Saptuam kikal a itna genkhiakna ding (Efs. 5:25). Nupa hinkhua ah lupkhawm a poimawh khat ahi. Himahleh azatdan ding diktak tuh itna genkhiakna leh itna hihpunna ding ahi. Nupa kipolhna ziak a itna om ahikei a itna genkhiakna lel ahi chih i theih ding uh ahi. Laisiangthou in tanhun kipiak tuah ding ahi, achi hi (1 Kor.7:3-4). Huaiziak in ganhingte bang a thangtat zatding ahikei a, siangthou tak a itna genkhiakna zatding ahi. Hiai nupa kipolhna toh kisai itna jiaq a Nupa kitheih siamtuahna a poimawh mahmah hi (1 Kor.13:1-ff).

Hehhun kituahsak louh ding: Nupa tuh thilteng ah ngaihdan kibang kimlou ding ahihman in kiselna omthei ding mah ahi. A bukimlou tuak nih kigawm ihi chih i mangngilh louh ding uh ahi. Billy Graham zi Ruth Bell Graham kiang ah apasal toh akisel ngei uhia chi-a adot uleh aman, “Kisel tham e, kiselna ding a om kei leh khat zawzaw tuh poimawh lou hiding ka hi uh,” achi hi. Nupa chidamten a hehhun uh kituah khak ding a veng uhi. Hihkhelha a om hun in kiniamkhiatna toh ngaihdam

kinget pah ding ahi. (Pau.15:1). Hehteng a hunlui teng pholh a gamteng sat louh ding ahi. Adik kituhsang in a khial hih kituh leng dambaih pen hi. Rev. Liankhosiam in, “Midik ngen a omkhawm sang un mikhial ngen a omkhawm uh leh akituak zaw uh,” achi hi.

Kilamet sangluat louhding: Na koppih apat ama hihtheihna sang a sangzaw na lametlough ding ahi. Mi i lametna a tamluat eh i khasiatna leh lungnoplouhna ding tam lel ahi. Chihlough zawk pen neikha dan in kingaihtuah kenla Pathian honpiak mah neikha ka hi chi lechin adam baihzaw ding hi. Huchi ahih lailai in na koppih a ding a na hihtheih om sunsun na chilbawllouh ding ahi.

Kipahtawituah ding: Nupa kipahtawi kichi a manbei a tha kipiaktuahna damdawi hoihipen ahi. Mihing kuamah phat leh pahtawi utlou ki omlou hi. Honsiamtu i biak Pathian nangawn a siamsa mihingte phat leh pahtawi ding kilamen gige ahi. Kisuknat a baihlam mahmah a himahleh sukdam nading in hun ala hi. Huaiziak in nupa kihihnat khaklough teitei sawm ding ahi. Nupa kipahtawituah ding ahihban ah, kithuzak gige ding ahi. Nupate kal a thuguk a omlouh

ding ahi. Deihdan, duhdan, utdan leh nasepte i kiphawkpiph leh nuam mahmah napi theizenpi a atheilou i kibawl leh utlou sasa a nihvei hehding a kisawl na ahi. Na koppih toh na kitenkhak hampaha kisa na hihdan nikhat in khatvei bek hihl zel in. Kimawhsaktuahna in nupa kal ah siatna tunbaih penpen hi.

Pathian amasapen a koih gige: Nupa hinkhua nuam leh dtdou taktak neih theihna ding in nupa hiding a hon bawl Pathian phawk a amah it masak pen aneih ding ahi. Pathian kiang a thumkhawm thei nupa hih ding ahi. Ken R.Canfiled in, “ Pasal khat leh numei khat salam a kithuahna hang in tate hong piang a, huai numei mah toh khalam a kithuahna apan mah in kimuangngam tate ahong piang uhi,” achi hi. Sa itna toh kia a i ki-it leh a tawluhai a kha itna toh iki it leh a tawldam huai mahmah hi.

Thukhitna: Pathian in thilsiamte a siam zawh in khovel ah innkuan bawlkhe ding in Adam leh Evi nupa hiding in ana bawl a ta ana pia hi. Leitung pumpi hoihna ding leh siatna ding innkuan ah kinga ahi hi. Inkuan sung achidam Chiang in khotang leh saptuam sung nuam in chidam hi. Innkuan nuam a

om theihna ding in nupa hoih leh kituak a poimawh hi. Melma Diabol in innsung pansan in khovel ah siatnatun ding a kisa a panla ahihman in nu leh pate i innsung chiat ah kiknawn a i nupa kal kemit a pan ilakthak uh poimawh mahmah hi. Pathian deihna bang a nupa i

hong ki-it Chiang in, “Nupa kal zong hong nuam semsem, kha sung ah kibual khawm leng... kitenkum lah tam deuhdeuh ngaih mel lah hoih semsem” chih la eite a hong hiding ahi. Toupan Nupa hinkhua nuam leh detdou tungding thak ding in hon vualzawl chiat hen aw! ■

BIBLE STUDY



Pastor Khamkhanchin Ngaihte, Local Pastor, EBCC Zion

Text : EPHESATE 2:1-10

Thupi: Hun Paise leh Tulel (Past and Present)

Thumasa: I sinlai nanung Ephesate 1:15-23 sung ah Paul in gingtute hinkhua a ginna leh itna muhtheih a kilangte ziaak Pathian kiang a kipahtu gen in, Pathian a theihchet semna ding un thumsak hi. Jesu Khrist, thil tengteng lutang, leitung leh vantung a thilteng Jesu Khrist lutang hihna nuai a kigawmkhawm vek ding Pathian lemgel, huai ding mah a Jesu Khrist tungtawn a Pathian thilhihtheihna kilangkhiate Paul in taklang in sinsak hi.

Tu in, Ephesate 2:1-10 sung ah gingtute hinkhua hon suut kiik a; hinkhua masa (2:1-3), tulel a hinkhua/Khrist a hinna thak (2:4-7), leh hotdamna pianzia (2:8-10) hon taklang hi. Tomkim tak a gen in, bung 2:1-10 sung a Paul in a gen tuh Jesu Khrist a hinna thak ahi. Bung 2na in bung 1na a Chiangzaw leh kim zaw in hilhchian hi. Laisiangthou siam Zerwick in Ephesate bung 2na thutun tuh

Rome laikhak pumpi laktom tawh kibang ahi ana chi hi.

Bung 2:1-3 hilhchetna:

Bung 2:1. *“Nou leng na tateleknaleh na khelhnate uh ziaak a si na hihlai un a hon hihhing hi.”*

Paul in, 1:20-21 a sihna apan Jesu Khrist kaihthawh a a omna tungtawn a Pathian thilhihtheihna thupi a taklat zawh in, gingtute gingtu ahihma uh hinkhua a hon gen hi.

“Nou leng” chih in Ephesa khua a gingtute, a laithon khaknate, Zentelte leh Judate kigawmkhawm, a genna ahi. “Tatekna” (Transgression) ichih in dan palsat a a kan a val a gamtatna genna ahi. “Khelhnate” (sins) chih leh “tatekna” chih thumal a gennop kibang ahi. “Sihna” in tatekna leh khelhna gah a kaw k a, tua sihna tuh sa a sihna sang mah in leng Pathian tawh kizopna kitan, Pathian apan khenkhiak a om genna ahi. Gingtute gingtu ihihma un Pathian’ dan palsatna/tatekna ziak in Pathian apan khenkhiak a om ihi uh (cf. Isai 59:2).

“..a hon hihhing hi” chih English a gelh khenkhat (NIV, ESV, NASB) in telsak kei mahle uh NKJV in telsak hi. Paite Laisiangthou (BI) ah, “Noute na hih uleh, na tateknate uleh na khelhnate uh sung a si na hi uhi” ana chi. Hiai thumalte (a hon hihhing hi) a tellouh ziak hiam a telziak hiam in a gennop a ki khektuan kei. A ziak, tang 5na a ahon gen thou ziak in. A gennop bel, nidang lai in, Pathian’ dan a tatekna ziak in Pathian apan khenkhiak in ina om ua, huaiziak in Pathian mai ah tuh asi ihi uh chi ahi. Hun paisa a gingtute Pathian mai a I dinmun genna ahi.

Bung 2:2. *“Huaite ah tuma lam in hiai khovel dan bang in, huihkhua a thuneipa, tua thumanglou tate sung a semlelpa kha deihdan in na khosa uhi.”*

“Huaite ah” achih in a tung a “kelhnate” a genna ahi a, khelhna nuai a hinkhua genchetna ahi.

Hiai ah Paul in, hun paisa a gingtute hinkhua thununtu thum a hon taklang hi. Khatna ah, “hiai khovel” (this world), nihna ah, “huihkhua a thuneipa,” leh, thumna ah, “thumanglou tate sung a semlelpa kha” ahi. Hun paisa ah, khovel paidan zuihna leh Setan/Diabol thununna ziak in Ephesa gingtute leh tuni a gingtute khelhna sal a tang in, Pathian tawh kizopna neilou uhi. Laisiangthou in Khovel tawh kilawmtakna tuh Pathian tawh kimelmakna ahi ana chi (Jakob 4:4). Paul in “hiai khovel” achih chiang in khovel paidan/kivaihawmna pianzia (system) a genna hi a, “huihkhua thuneipa” leh “thumanglou tate sung a semlelpa” chih in Setan genna ahi. Pathian thubang a gamtatlouhna tuh Setan dan zuihna ana hi.

Bung 2:3. *“Huai thumanglou tate lak ah eite leng tuma lam in sa duhgawlna hih in, I taksa utnate bang in I om vek ua, midangte mah bang in thangpaihna ta a piang ina hi uhi.”*

“...tuma lam in...” (once/formerly/previously) chih thumal in hiai a Paul thugen hun paisa a gingtute hinkhua tawh kisai ahi chih a taklang hi. “Sa duhgawlna” (lust of the flesh) chih in mihing sa a hing ihihna in naktak a hinkhua thunun ahihna taklang hi. “Lust” in lunggulhna/utna hoihlou lam genna ahi. Deih tuntu, lunggulh tuntu, thildang ngaihtuah theilou zen a deihna lam a kawak hi. Paul in “eite” (we) achih Zentelte apan Judate tuamgenna hilou in amah leng gingtute lak (a laikhak simtute lak) a a ki gentelna dan a lak a dik zaw ding. Paul in, gingtute hinkhua masa pen ngaihtuahna/lungsim hoihlou leh lunggulhna gilou in naktak a thunun ahihdan taklang hi. Kha thununna nuai a hing lou a, sa (flesh) thununna nuai a khosakna genna ahi.

“...thangpaihna ta a piang...” chih in a gennop tak ahiehleh, khelhna ziak a Pathian hehna/thangpaihna thuak ding a

mawhpaih a om ihihna ahi (children who are destined to experience the wrath of God). Kha thununna nuai hilou a sa thununna nuai a na khosa a, Pathian thu manglou ina hihtak man un Pathian thangpaihna thuak ding a mawhpaih ina hita uh chi ahi. “Midangte mah bang in” chih in mihingte pianken a mikhial, Pathian thangpaihna thuak dia mawhpaih a om tate hinkhua genna ahi.

Bung 2:4-7 hilhchetna:

Bung 2:4-5. *“Himahleh, zahngaihna hau Pathian in, itna thupitak a hon it ziak in, tateleknate ziak a si ihihlai in Khrist toh a hon hihhing a, hehpihna a hotdam na hita uhi.”*

“Himahleh” chih thumal poimawhahi. Hiai thumal zangin Paul in ama a mikhialte dinmun mulkimhuai tak a pan dinmun thak, lam-etna a dim ahon pulak hi. Pathian thangpaihna thuakdia mawhpaih a om mi te Jesu Khrist tungtawn in tua Pathian thangpaihna apan hotkhiak ihi ta uh achi. Pathian zahngaihna a hausa (rich in mercy) ahi achih ban ah, a itna thupi ahi achi lai hi. Hiai ah Paul in Pathian zahngaihna leh itna a dim ahiman in bangchizahta in khial kisa mah le hang lam-

et ding nei ihi chih taklang hi. Amah (Paul) hinkhua mahmah leng Pathian zahngaihna leh itna thupi kilatna ahi hi. Pathian itna leh hehpihna thupitak ziak in khelhna apan hotdamna I tang uhi.

“Hingsak” hiam “hihging” (made alive) chih gingtute adia Jesu Khrist a Pathian nasep 3 Paul in taklatte lak a amasa ahi. A dang 2te tang 6na ah hon gen hi. Khelhna ziak a sihna apan Jesu Khrist ginna tungtawn a hinna thak neihna gen ahi. Hiai hinna thak tuh Jesu Khrist thawnawanna thilhihtheihna gah ahi.

Bung 2:6-7. *“Khrist Jesu ah amah toh hon kaithou a, van munte ah amah kiang ah a hon tukhawm sak hi. Huchi a hun hongtung dingte a, Khrist Jesu a I tung a migitna nei a, a hehpihna hauhdan a etsak theihna ding in.”*

A tung a tang 5na a gingtute adia Jesu Khrist a Pathian nasep khat a taklat zopna in **tang 6na** ah a dang nih hon genbeh hi. Huaite – “Khrist tawh hon kaithou khawm” chihleh “van munte ah amah kiang ah hon tusak” chihte ahi.

“Jesu Khrist ah amah toh hon kaithou” chih in pumpi

thohnawanna lam sang in gingtute’n Jesu Khrist thohnawanna ziak a hinna thak (new life) i neih genna lam a kawk zaw (cf. 2 Kor 5:17). “Van munte ah amah kiang ah hon tukhawm sak hi” a chih Chiang in, gingtute Jesu Khrist toh kipumkhat (union) a, amah a hinna thak neihna tungtawn a dinmun thupi leh sang koppihthe ihina genna ahi. Bung 1:20-23 a Pathian in Jesu Khrist a kaihtoh a, van mun a a taklam a tutsak in Jesu Khrist dinmun tungnung, pahtawina leh setan thuneihna tengteng (all of the demonic powers) tunglam a thuneihna piak ahina a gen a, tua tawh kizawitawn mah a gingtute tua dinmun thupi leh hamphatna piak a om ihi chi ahi.

Tang 7na ah, “huchi a” chih in tang 6na a Pathian’ nasep (mikhialtehotdamna) tungtawn a Pathian hehpihna leh itna thupi miteng muh dia taklat a a om Pathian deihdan ahi chih gen nuam ahi. Hotdamna i chih Pathian hehpihna ziak a hi thei (possible) ahi a, huai mah leitung mite’n a muh ua, a theih ding uh Pathian deih ahi. Mikhial ngaihdamna ban a ta hihna piak a omna in Pathian hehpihna hauhdan a langsak hi. Jesu Khrist a hinna thak I tan

gentaklough a pahtawina dinmun “ta” hihna tanpha I ngah Pathian hehpihna hauhdan kilatna ahi mahmah hi.

Bung 2:8-10. *“Hehpihna ziak a ginna tawn a hotdam na hi uh hi; huaileng noumau a suak ahi kei a, Pathian thilthawnpiak ahi. Thilhih ziak ahi kei, huchi hi keileh mi’n a suang kha ding hi. Thilhoih hihding a Khrist Jesu a siam a om in, ama khutsuak ihi uhi; huai thilhoih hih I khosakna dan ding in Pathian in a bawlkhol hi.”*

Hiai ah Paul in hotdamna pianzia tomkintak in hon gen hi. Mikhial ngaihdamna tuh phulouh Pathian hehpihna ziak liauliau ahi a, ginna a san ding ahi. Hotdamna kibulphuhna tuh Pathian hehpihna ahi a, a lampi tuh ginna ahi. Hotdamna kichi hehpihna ziak a Pathian thilthawnpiak ahihman in, mihing in nasep a a lawhkhiaik hilou ahi (t9). William Barclay in, khelhna ichih dan palsatna kia hilou in, Pathian lungtang kitamkham sak ahihman in huai lungtang kitamkham nasep tawh thoihdam vual ding hilou a, Pathian in ama deihtelna a ngaihdamna a piak louhngal a damna ding dang omlou ahi achi.

Tang 10na ah Paul in hotdamna in a gahsuah ding a hon gen a, huai tuh, *nahoih sep* ahi. Hotdamna ziak in gingtute’n sihnung in lam-etna kipahhuai I nei uhi. Ahi a, hotdamna diktak in tuh leitung I damlai ngei a leng gah a suah ding ahi. Igam a I theihkheluh uh poimah mah khat ahihleh hotdamna ichih van-gam kaina ding kia a ngaihtuah in, tu leh tu a I damsung a zatna ding omlou dan in I ngai kha uhi. Huai hilou in, hotdamta ihihna/gingtu ihihna I damsung ngei a muhtheih a niteng hinkhua a akilat ding ahi. Huaiziak in, Paul in, huai nahoih semding a Jesu Khrist a siam ihi uh achi. I hotdamna in I niteng hinkhua zatna ahon pi/thunun ding ahi.

Zawhna: Gingu ihihma in setan thuzawhna nuai a khosa ihi. I niteng hinkhua, I deihtelnate leh I lunggulhte setan deihdan zuihna ahi sek. Himahleh, gingu I hong hih chiang in Jesu Khrist thuzawhna leh deihna tawh kituak a hinkhua I zat ding ahi ta. Vak tate ihihtak man un vak tate bang a I khosak ding uh ahi (Eph 5:8). Huaiziak in, hotdamna ichih hun paisa a thiltung himahleh tulel niteng hinkhua a a gah muhtheih a akilat ngeingei ding ahi. Tua bang ding in Toupa’n simtute hon vualzawl hen. ■



Gammial Aw

A mangthang khaté Jesu Khríst khebul a pilutna nna semthei lai ding a saptuamte hun hoih leh hun manpha hon pia i biak Pathian min in Gammial Aw simtute tengteng itna chibai aw! Ei hoihna, siamna leh pilnate suan ding bangmah omlou ahihlai a A ma hoihna hon koppiph a tuni chiang dong field i neihte a kalsuan thei lai ding a hamphatna hon pia i biak Pathian thupina tengteng i khusak hi. Khovel siatnate'n nisim in hong umkim vel mahleh a nna i sep Pathian in hon taisan lou ahih dan khateng a field a semtu Missionary-te leh A misiangthoute thumna ziak a gah kipahhuai taktak i muhte apan i thei hi. Nidang a field a i sepdan leh tuchiang a sem a i kalsuan dan hong kibang thei nawnlou tampi muhtheih a omta ahihman in, semtute'n Pathian apan pilna leh lunggel siamna toh kal hon suan uh poimoh ding hi. Naakpi a field i neihte thumpih a delhzui gige poimoh i sa hi. Pathian vualzawlna ziak a field a semtute kalsuanna tungtawn a gah i muhte leh kipahthu genna leh thumna a phawk ding hiai anuai a bangte enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n gingthak mi 11 (Basbari-1, Taplejung-1, Padajungi-5, Takuthang-2, Gopetar-2) hon piakte leh baptisna tangthakte khalam kalsuanna ding Khasiangthou pina leh makaihna ngetsak ni. Amaute ginna ua hong kip semsem ua, khovel thilte a kaihbuai a hihlouna ding un thumpih ni.
2. Field a semtute sepna tungtawn a Toupa'n a hunhun a gah muh ding honpiak zelte ziak in kipahthu gen ni. Semtute'n leng chidam a Pathian ompihna tang a hon sepzom theihna ding un thumpih ni.
3. Filed Kumsim Khawmpi 32na buaina omlou a lamzangtak a zoh a om thei ahihman in kipahthu gen ni. Hiai khawmpi hun in Upa 2 ordination leh Licentiate Pastor 1 piak a om thei ahihna ah kipahthu gen in, Ordination piak a omte'n Pathian

deihna bang a hon sepzom theihna ding un thumna in phawk ni.

4. Himalayan Missions Field nuai a Central Nepal ah station thak munnih ah semtu nih ; Evan Sangbiakmawi - Khurkhure leh Evan Jamkhanlian – Bharatpur te lutthak ua, West Bengal ah Pastor T Ginkhozam - Tarabari station thak a lut hi. Amaute munthak a gingtute kikhoppih ding om louhna mun a nasep pan ding a kisa ahihman un, Khasiangthou kithuahpihna leh ompihna ngetsak ni.
5. Sawltak (Pastor Candidate) mi 4te'n May khasung a Nepal Field ah Field Exposure a neih uh buaina omlou in lamzangtak in zoutheita uhi. Amaute'n, June khasung Dhemaji Missions Field ah Field Exposure sunzom nawn ding ua, Pathian ompihna tang a gahsuah leh lamzangtak a kal a suanzom theihna ding un thumpih ni.
6. NEBC sung a Basic Bible School singtang lam a Faklung khua ah May 13- 23, 2024 sung neih in om a, lamzangtak a zoh in omta hi. Kipahthu gen in, hiai hun a sinsakna piak a omte'n field a manphatak a a zatkhiak theihna ding un thumna in delhzui ni.

B. DHEMAJI MISSIONS FIELD

KIPATHU GENNA LEH THUMNA DINGTE:

1. Field a Hostel Ministry ah Toupa'n naupang kep ding hon piakte ziaak in kipahthu gen ni. Kep a om naupangte leh a kemtu semtu Missionary-te a khalam kalsuan zelna ding uh thumna in delhzui ni.
2. Pathian vualzawlna leh ompihna toh Lachangaon leh Kapurdhuwa ah thiapiak (Sawm a Khat leh Missionary vakna) pethak bang a kibehlap zel ziaak in kipahthu gen ni.
3. Saptuam paidan leh thugin-te kisinsakna Pastor S Thangbiakmang makaih in field in kha paisate ah Bongalmari leh Lachangoan mun ah nanei thei ua manpha i sa hi.
4. EBCC Bitarbacha a om Ukuran Kutum toh semtute'n Pathian thu a houlimna neithe i ua, maban sawn theih a om ziaak un kipahthu gen ni. Amah ahihleh nidang a a zi-le-tate Pathian thu ziaak a doudaltu a pangsek himahleh tu a Pathian in

thumnate ziaak in houlimpih theih ding a a kong hon honsak ziaak in kipahhuai i sa a, houlimpihna tungtawn a gingtu hong suahna ding in thumna in phawk ni.

5. Field ah gingute lak ah damlounhna chi tuamtuum nei bangzah hiam om uhi. Amaute'n Pathian apan khalam leh salam a damna hon ngahna ding un thumpih ni.
6. Namgharia khua a khosa Vaspayee Doley leh a zi a ding in thum ni. Amaute'n maban a pianthakna hon neih ua baptisna a tan theihna ding un thumpih ni.
7. Bongalmari a om gingtu i na thumpih sek Mrs Bobita Taw, kha nih val a chi bawk ziaak in damlou in om hi. A damtheihlouh ziaak in semtute'n thumsakna neizel mahle uh amah leng lunglel gawp in Jesu'n hon damsak utlou ahi chi in, a ginna tawpsan hi. Pathian hing hon muhthak theihna ding in thumpih ni.
8. Semtute'n vehna nei a Pathian thu a houlimpih uh Boleshwar Daw leh innkuante, Pathian thu hong lunglut ua maban a semtute'n a kalsuan zom theihna ding un thumpih ni.

C. MANIPUR MISSIONS FIELD

KIPATHU GENNA LEH THUMNA DINGTE:

1. Toupa'n Field a Missionary-te leh a innkuahpihte uh ban ah gingtute tuni chiang dong hon kepbitsak ziaak in kipathu gen ni. Pathian thupiak lohching leh gahsuahtak a semtute'n a sepsuah zel theihna ding un thumpih ni.
2. Field a semtute leh gingtute Khalam a lau leh linglou a hong dinkip theihna ding un thumpih ni.
3. Manipur a lemna leh muanna tunding nawn hong hih a, field a Biakin leh Quarters hihsia a, halsetute'n Jesu itna a hon theihna ding un thumpih ni.
4. MEBCC Missionaryte'n pilvangtak a Ministry amau hihtheih bangbang a kalsuan theizel uh kipathu gen in, thumna toh delhzui zel ni.
5. Gingtute'n a ginpa uh Jesu Khrist mite'n taisan ding in sawl mahle uh, Amah adia muanhwaitak a dingkip zelte ziaak a kipathu gen ni. Gingtute'n gingloute tungtawn a zeetna a tuah zelte uh a mualsuah zohna ding un thumpih ni.

6. Lamdangtak a Toupa'n field a nna hon sep a, khamangthang tampite'n Jesu Khrist khebul a naihna ding un thumna in delhzui zel ni.

D. HOJAI MISSIONS FIELD

KIPAHTHU GENNA LEH THUMNA DINGTE:

1. Goalpara apan Hojai Field a semtu ding a suan a om Evan Premjit leh innkuante Hojai station chidamtak in tungta uhi. Kipahthu gen in, Pathian ompihna toh semtu gahsua hong hihna ding un amah leh innkuante thumpih ni.
2. Toupa'n Hojai station a semtute tungtawn a gingtu hon piakte ziak a kipahthu gen in, amaute'n a ginna uh taisan lou a Pathian a ding a khuam muanhuai hong hihna ding uleh a khalam uh hong khang semsem a, taksa chidam a neih theihna ding un thumpih ni.
3. Damlouhna ziak a Delhi a ki checkup sak a hoh Evan Manzarual buaina omlou a a hihding bangbang zou in field chidamtak in tungkik nawnta hi. Kipahthu gen in, Pathian ompihna toh gahsua leh lohchingtak a field a hon sepzom theihna ding in thumpih ni.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Maibang station pansan a semtute'n kum thum val bang semta himahle uh Khristian doudaltute ziak in station pawtkhiak san ding a thupiak a muh ziak un pawtkhiaksan ta ua, poi i sa hi. Himahleh, Pathian in amaute hon kepbit sak a doudaltute lak apan venbit a om a Diphu mun damtak a pitung ahihman un kipahthu gen ni. Amaute'n a sep hunsung ua tangthupha a genpiah khak mite uh lungsim a Pathian in thu a genzom a, gingtu muanhuai a hihtheihna ding un thumtute'n thumna toh delhzui zel ni. Saptuam leh mimalte thumpihna ziak a hun haksatak a a dinlai ua Pathian pina khut muanhuaitak in makaih ahihdan muh theih a omte ziak in kipahhuai i sa mahmah hi.
2. Pathian gamna sem a i kalsuanna Maibang station pansan a semtu nih i neih ; Evan Thangbiaksuan leh Evan

Kamkhenthangte'n station a pawtkhiak santaak uh toh kiton in amaute'n Kamrup District a sem ding in suan in om uhi. Evan Thangbiaksuan in Bamunigaon pansan in sem ding a, Evan Kamkhenthang in Dhupdhara mun pansan in sem ding uhi. Pathian ompihna toh gahsuah leh lohchingtak a a sepna ding uh mun leh mual kipiakna munte a hon sepzom theihna ding un thumpih ni.

F. GOALPARA MISSIONS FIELD

KIPATHU GENNA LEH THUMNA DINGTE:

1. Toupa'n field a semtute chidamtak a semzom thei dia hon makaihsak zel ziak in kipahtu gen ni. Semtute mahmah in leng Khasiangthou thopnate tang a, khamangthangte veina leh itna toh hon sepzel theihna ding un naksem in thumpih ni.
2. Semtute'n a maban a sepding dan plan leh project a neihte uh a thawn a kalsuanna hong hihlough a, gahsuah nasep leh kalsuanna ahih theihna ding in thumna in delhzui ni.
3. Field a ginglou mite vehna neih chih thil haksapi ahihlai in, Toupa'n semtute tate zang in a lawmte uh tungtawn a mimal leh innkuante veh thei zel ahihman un kipahtu gen ni.
4. Semtu innkuan i neihte'n Pathian apan khalam leh salam a damna hoihtak a tanzel theihna ding un thumpih ni. Akallak a innkuan damloughna in i semtute bawmthei zel ahihman un thumna toh delhzui gige poimoh i sa hi.
5. Pathian thu a houlimpih theih ding semtute piak a om zel ahihman un kipahtu gen ni. Houlimpihsate awl a Jesu thu genpih ding tup a semtute'n a neihte uleh houlimpih a om dinge leng a lunglut theihna ding un thumpih ni.

G. KAMRUP DISTRICT

KIPATHU GENNA leh THUMNA DINGTE

1. Kamrup District sung a station tuamtuam i neih a semtute'n Pathian ompihna toh tuni dong hihbuaitu omlou in kalsuan theizel uhi. Maban a leng Pathian in amaute ma hon pisak zel a, ginglou mite lak apan hunbit a hihzel theihna ding un thumpih ni.

2. Pathian thu houlimpih theih ding tuni chiang in semtute piak a om zel ahihman un kipahthu gen ni. Tamsem piak a hong hih ua, houlimpihsate'n leng Jesu Khrist a hondampa ding tan ua a saantheihna ding un thum ni.
3. Kamrup District a semtu omte tungtawn a gah kilawmtak piak a i ompah theihna ding leh daltu melma setan lak a amaute humbit hong hih a, tanchinhoih zaleentak a tangkoupiah a hihtheihna ding in thum ni.

H. MISSIONS CENTRE, GUWAHATI

KIPAHTHU GENNA leh THUMNA DINGTE

1. Rev Thangsanglian, Field Coordinator, Assam Missions Field leh a seppih Pastor T Pauzalian leh Evan Suanboy Vualnamte'n leng chidamtak in Pathian ompihna tang in Missions Centre, Guwahati pansan in semthei zel uhi. Pathian ompihna tang a a mohpuakna chiat uh kizen leh feltak a Pathian deihna bang toh kituak a hop sepzuah zel theihna ding un thumpih ni.
2. Semtute'n ginglou mite leh namdangte lak a sem ahihna uah gamtat khohei a Khrist theihpihtu muanhuai hong hihzel theihna ding un thumpih ni. ■



DORCAS *Corner*

Kum 2024 kimkhat tan hon pikai i biak Pathian min phat in simtute Hondampa Jesu Khrist min in itna chibai k'on buk hi.

Inkuan kipumkhat leh kituak dialdial a omkhawm a nuam in a etlawm hi. Himahleh kipumkhat lou, kithutuak thei mahmah lou, kikhen a ngaihdan kibangtheilou nuta, pata chih phetlough nu-pa (Couple) kipumkhatlou leh kilemloute a ding in hunnuam chih omtheilou a gawtmun masa thuk theih maimah hi. Laisianghou thu in, "...Koigam leng amah kidou amangthang nak; koi khua hiam, inkuan khat leng amah kidou, a khusuak kei ding" (Mt.12:25) chiin a na gen hi. Inkuan kilemtak a khat leh khat ki-ittuah ding

mimal a ding kia a hoih hilou in saptuam leh khotang a phatuam leh khantouhna ahi. Inkuan kituaktak a hingkhawm, khosa khawmte dia Pathian thuchiam tuh vualzawlna leh lohchinna muhding ahi. Pathian thuchiam tangding, hamphatpih ding ei amite a dia a hon bawlsak i tantheihna ding in mohpuakna leh poimohna insung mite'n ei hihna chiat ah i nei chiat hi. Inkuan kipumkhatna tundingthak nawwna dia Nute' poimohna biikte:

1. Khrist Tanchin hoih toh omdan kituaksak dia sinsaktu: Inkuan a tate'n NU a theih masakpen uh ahi. Nute'n inkuan ah mohpuakna lianpi nei in thilteng ah amau omlou hileh hichitan tunglou ding chihtheihna mun tampi om hi. Tate kepna ah, pasalte panpihna ah akul leh poimoh uh saktuahsak, apoimoh teng ua amau a dia akiman gigete ahi uh. A poimohna uh thupi in a zahtakhuaina uh haihvual hilou in, inkuan kipumkhatna ding in inkuan zangguh ahi uhi. Anuam a haksas a nute'n tate makaih in kem uhi. Midangten a hihtheih hetlouh nu in tate hinkhua ah kizopna kiptak, mihing in a theihtheih dia lungsim kizopna nei uhi. Tate hong pian akipan in ~~NU~~ in tehpihbei, kepna leh itna tate a ding in luikhia hi. Tuni a na dinmun, ka tuntheihna dia kal (step) masa hon suanpih, a dik lampi a hon pi a omdan, chiindan kilawm hon sinsak Nute ahi. I mimal hinkhua bawlhohina ding in Nute poimoh pen ahi chile'ng a uanglua hilou ding a, tate poimoh nute'n theichian pen uhi. A diak in tate toh hinna kizom in, gilsung a nau hon pai ua kipan in nu leh ta kizopna ana om ta hi. Taksa, lungsim a theihtheihna anuam leh haksas, kipah leh lungsim hun tan ah laigui kizopna nu leh tate kal ah om hi. Huaiziak in nu in tate' lungsim leh a haksatnate uh theihsiampih thei pahpah uhi. Pate sang in Nute kiang ah tate maingal zaw in ngaih leng ngai zaw uhi. Huaiziak in nu in inkuan kipumkhatna ding in i poimohna lianlua ahihna theichian in Khrist Tanchin hoih toh kituak a hinkhua zang ding in i kichial hi.

2. Ngaihdamna leh kingaihniamna sinsaktu: Inkuan ah tate'n nute ah muanna nga mahmah uhi. Haksatna tuaklou inkuan a vang mahmah khading, himahleh haksatna hong tun chiang in bangchin i maituah a? Hinkhua nuam gige lou, lungkiak hun, damlouna ziak a buai hun, sum neihloun ziak a buai hun bang

om thei. Huchibang lam tuamtuam a haksatnate i tuah chiang in Pathian muanhuaidan tate sinsak a Amah toh hihveng ding leh amah a muanna ngakding sinsaktu thupi nute hihna ahi. Huan, midangte toh kal ah utthu hilou in leng buaina tuahtheih ahi. Himahleh huai hun tak ah Khrist in hon ngaihdamna tungtawn a midangte ngaihdam ding leh i dikna hihiam, hikei hiam ta leh leng ngaihdam ding ahi chia practical a zuih ngai om lehleng zui teitei ding in Nute'n poimohna nei ihi chih phawk in sepkiak poimohna om leh sempah ding in pan lale'ng i chi hi. Huai mah Jesu'n a hon sinsak amah deihtel thu hilou in a Pa thumang in Khros ah sihna tanpha hong thuak in sa leh kha ah damna i tang hi. Huchibang in inkuan damna ding in Nute'n kiniamkhiak hinkhua kua tung ah hitaleh ngaihdamna toh zang lehang kipumkhatna tungding thak thei ding ihi. Kuapeuh in kua tung ah leng thubuai nei hile uchin, kithuakzou chiat in, kingaidam tuah unla, Toupa'n a hon ngaihdam tak bang in kingaidam tuah chiat un (Kol.3:13).

3. Nute inn lamtu a hi: Numei pil in innte a lam a, himahleh mihai in amah khut in a phelsia (Pau.14:1). Hiai Laisiangthou thu in a gen i tenna sing inn hiam, cement leh suang a kibawlte hilou, hiai vanzat a kibawl innsung a teng mite gen ahi. Numei nih inkuan tuam akipan in pasal unau nihte insung ah mou in a kuan uhi. Mou tegel om ma in unaute leh a insung mite uh kituak dialdial a khosa, a nuam leh haksa thuakkhawm in a om uhi. Moute ahong lut chiang un mou tegel mah hong kina ua, insung nuamsa pen, nuamlou a suaksak uhi. Inn nei pu in, moute' kiang ah, 'Nou hong omma a kou kina ngeilou ka hi uh' chi hi. Mi insung a kituak dialdial a omkhawm lai zanzek a valut in, a luttegel kina, midangte leng kituaklou sak lai NU i hikha ding e! Kivelpa ni. Mihai inn mahni khut a phelsia hihkhak ding lauhuai mahmah hi. Zite aw, Toupa ah a kilawm hun bang zel in na pasalte kiang a kiniamkhiak un (Kol.3:18). Numei pil inn lam dingte om dingdan ahi. Inkuan mite toh kia, kisel a omlou in a kituakloute kituaksak ding, kilemna bawltu leh insung nuamsaktu numei i hih dingdan him ahi. Mahni pasal kia mai-et a midangte nelhsiah mai lou in, Pathian in inkuan hon piak a insung mite toh kituaktak a khosak

khawm ding Pathian deihdan ahi. Nna khat peuhpeuh i septe inkuan khanna ding leh masawna ding in Toupa mitmei veng in kuhkal suah a sep ding ahi. Na hih peuhmah uh, mihing a ding bang hilou in, Toupa a ding zaw in kilawptak in hih un. Toupa a a kipan in a itna gouluah ding na mu ding uh chih thei in: Toupa Khrist nasem na hi uh (Kol.3:23-24). Hiaibang a i sep leh innte lam numei pil kisuak ding hi.

Inkuan kipumkhatna tunding thak nawna ding in nute'n hihtheihna leh hamphatna nei ihi chih phawkthak in theihtawp suah ni. Midang kuahiam hong pai in ei inkuan tungding ding in awlmohna thupitak hong neilou ding hi. Huaiziak in ei nute mah in eimah omdan Khrist tanchin hoih toh kituak a khosa in, i pasalte kiang ah kiniamkhiak nun hinpah ding leh inn lamtu muanhuai hiding, inkuanpihte leh tate toh insung nuam bawl a kipumkhatna tungding chiat ding in Toupan hon vualzawl hen. ■



YOUTH EBC Corner

KIPUMKHATNA OMZIA

Khristian Thukizakna simtu tengteng leh ka tuailaipih munchih a omte amasa in i Hondampa Jesu Khrist min in Itna Chibai ka hon buk masa hi. Pathian hehpihna leh zahngaihna ziakin tukum a kha 4na tan a pikai in i om ua Toupa min iphat masa hi. Tuailai pawl in i thupi KIPUMKHATNA khennenna ah KIPUMKHATNA OMZIA saulou in enkhawm leng i chi hi.

Kipumkhatna omzia ichih chiang in a polam a i mihinpihte muh theih a kilang khia, i kampau ah, omdan leh gamtat ah, midangte i khualna leh panpihna ah, i seppihte toh ikal ah, bangchin a kilang khia a? Kipumkhatna omzia tuh Jesu Khrist nungzui diktak ihi chih taklatna chikhat leng hong hi hi. Nungzui ihihna midangte'n a muhtheihna ding uh tuh i GAH ua kilang ding ahi. Jesu Khrist tungtawn a Pathian toh pumkhat na hihna, na GAH a muhtheih ding a kilatkhiak ding ahi.

Tua GAH ichih te *Galatia 5:22-23* “*Kha gah ahihleh, itna, kipahna, lemna, thuaktheihna, migitna, hoihna, muanhuaina, Nunnemna, kidektheihnate a hizaw uhi; huchibang kalh lam in danthupiak himhim a omkei hi.*” Hiaite banghun, koimun, bangchi bang in i hinkhua ah a kilangkha ua chih kivel tuak mahmah hi.

1. ITNA: Hiai pen i kibilphuhna leh a poimoh penpen ahi, hiai in a gennoptak mahni kimanghilh khop a itna, Jesu hon sinsak bang a midangte itna ziaak a kipumpiakna ahi. Sawltaklian Paul in *Phi.2:4* ah ‘Na lak ua kuapeuh in amah ading kia enlou in, midang a leng en sam hen.’ ana chi hi. I muhtheihlough Pathian ITNA ah bang ichi ua? i mihinpihte ITNA ah bang ichi ua? Unau ki-ITNA ah bang ichi ua? Nang ana kivel mah.

2. KIPAHNA: Khristian/Gingtu khat kipahna pen i thiltuah zelte a kinga himawkw lou ahi, himahleh tuate khenlampek a thukzaw, Pathian toh a tapa Jesu Khrist tungtawn a kichimatna ineih a lungkimna/lungdamna i neihpen hizaw ahi. Kumpi David in khelhna a apuk in Pathian kiang a thumna *Sam 51:12* Na hotdamna kipahna hon penaww inla; na Kha khut in honlen gige in, chi hi. I thiltuah leh neihte ziaak a kipak i hihle zaw neihlough hun a kipaklou di kihi ahi. Sawltaklian Paul in thil tengteng a kipahna thuguk ka theita, hon hihatpa Khrist Jesu ah bangkim ka hih theih achi neihtheih poimoh mahmah hi.

3. LEMNA: Hiai in Pathian toh kipumkhatna ineih toh kiton a eimah sunglam a muanna/lungmuanna ineih pen leh midangte toh kituahna/kihoutheihna ineih pen gen ut hizaw ahi. *Phi.4:7* Huchi in Pathian muanna, lungsim himhim a theihzoh vuallouh in Khrist Jesu ah na lungtang leh na ngaihtuahnate uh a hon kepsak ngeingei ding hi.

4. THUAKTHEIHNA: Midangte toh i kisukkhak hun a hon thukna te bang ichi lak a? Hehhak ding in THUAKTHEIHNA i nei hia? Mi hon chih/bawl bangbang a thukkik pahpah ut ihi hia? Jesu Khrist THUAKTHEIHNA ngaihsun mah dih, midamsak leh misi nangawn kaithoupa, mite chilphih, enghouna leh chiamnuihna a tuahlai thuklou in Pa a thilhih uh a thei kei ua ahi, ngaidam in chin dohzou leh thuakzou tak in ngaihdam ngetsak lai hi. *2 Pet 3:9* Mi khenkhat in zekai a sak bang un Toupa zaw a thuchiam ah

a zekai kei hi; kuamah manthat deihlou a, mi tengteng hong kisik deih in noumau lam ah a dohzou zaw ahi.

5. MIGITNA: Midangte toh kituahtheihna ding a poimoh mahmah ahi, thilphalna leng ahi a, midangte awlmohna leh mahni sang a midangte koih masakna kilatna ahi. Eph 4:32 Huan kihehpih chiat a lainatna nei in om unla, Pathian in Khrista nou a hon ngaihdam bang in, noumau leng kingaidam tuahchiat un.

6. HOIHNA: Hoihna in hon muhsak nop i omdan leh hinkhua a hoihna midangte toh kikal a kilatna, midangte'n a hamphatpih ding leh etton theih ding a suahkhiak ding ahi.

7. MUANHUAINA: Kah.3:22-23 Toupa chitnate ziak ahi hihmang a i omlouh uh, a lainatnate a zuau ngeilouh ziak in. Zingsang teng in a thak zel ua; na ginomna a thupi hi.

8. NUNNEMNA: Laisiangthou a Mosi bang a nunnem leh migi om diam chih ngaihtuah huai pi ahi? Israel mite genhak pipi, lungkhauh leh thumangloute ahihlai a leng Pathian mai a ngetsak lai, Haksatna tampi toh kum 40 vingveng gamdai a Israelte a pi nung a GAMCHIAM lut lou a galmuhsak lel, huchih lai a leng a phunna leh vuina kimu lou, thupi mahmah hi. Ei tung a tua bang hileh bang ichi di, lungkim thei mahmah lou a phunna ding kia zong, mi hih teng dem leh gensia kihi den mai, ngaihtuah thak mah dih unau, na nunnemna a tehna bang omleh bangtan ahia?

9. KIDEKTHEIHNA: Kidektheihna kichi Khristian hinkhua tehna hoih mahmah khat ahi. Muh louh chiang a hihlou chihpen kidektheihna hilou ahi, nek ding dawn ding a tam mahmah lai a leng tuate khoihlou a taisan ngam pen kidektheihna ahi. Nek leh dawn thu kia ah hilou in, heh leh thangpaih hun in, mobile phone mai ah, lup leh thoh hun in leh numei pasal kal paktatna ah leh adang tampi om in teh, Bangchi tuk in na kidek zou a? Khemna na tuah hun in bang na chi a?

Thukhitna: Hiai khagahten i nungchang hon taklang a, i omdan hon taklang a, i kipiakna hon lakkhia a, midangte toh i kichimatna hon kinaisak a, i khalam ah leng hon khamisak in Pathian toh leng kinaizaw in hon omsak hi. Hiaite a poimoh leh kul hunhun a kilangkha a midangte toh kinaihna leh kipumkhatna hon tungdingte hi ahi. Hiai bang gahsuangthei chiat ding in simtute Pathian in hon vualzawl hen. ■



CHILDREN'S *Corner*

NAUPANGTE NIPINI THUPUAK 2024

Naupangte' Nipini Chibai! EBC Saptuam munchih-mualchih a om kuapeuh in hiai nipini Toupa' ompihna toh manphatak a i na zat uh ka lamen hi. Hiai hun poimoh tak ah naupangte'n i theih ding thil thum chauh ka hon gelh a, ana limsak ding in i kingen hi.

1. GAAL LAI AH NAUPANGTE

Hunte a hoihlough ziakin, ut leh ut louh thu hilou in gaal i nei uh a, huai in i hindan ngeinate hon subuai ahihman in poi i sa mahmah hi. Himahleh hiai bang hunah Pathian i muang ding uh a, a thutak sungah i om ding uh ahi. Aziak tuh, aman a mi Israelte leng tuabang a gaal ziaak a patau leh ling a a-om laitak un "*Lau kei unla, huai mipi thupi mahmahte ziaak in leng lunglel sam kei un; kidouna noute kidouna ahi kei a, Pathian kidouna ahizaw ngal a*" a chi hi. (2 Kronikil 20:15) Pathian muanna sungah om in naupangte'n tuh galdouna sangmah in laisimna ah lungsim tam pe zaw lehang ahoih ding hi. A ziaak tuh, i gam-le-nam, insung leh Saptuam maban ding noute khut ah hong kinga ding ahi.

2. INTERNET LEH SOCIAL MEDIA

Khovel in honpi dan dungzui in, naupang tamtakte'n smart phones leh internet-te zangthei in i om a kipahhuai hi. Himahleh, huaite i zatsiam kei leh ei a ding kia hilou in midangte a ding in leng siatna tunthei hi. Thuzuau pipi khawng gelh a thehthang thei tampi i omziaak in huai bangte naupangte'n ihih hetlough ding uh ahi a, thu om peuhpeuh leng thudik hikim vek lou ahi chih theih ding ahi. Naupang i hih lai in tuh Social media khawng zat tamlouh ahoih pen hi. Tua banah phone et tam luat, games kimawl tam luat kichi naupang leh a liante ading natawm a leng hoihlou ahih manin pilvan ding ahi. Laisiangthou in, "*Pilvang unla, limsak un; na melma uh Diabol, humpinelkai humham bang in a nek theih ding*"

zong in a vialvak hi" (1 PETER 5:8) a chi hi. I lunglut mahmah, nuam i sak mahmahte khawng melma Setan in ei hon suksiatna dinga zangnuam mahmah ahi chih phawk in pilvang tak in i om ding uhi.

3. INSUNG AH NAUPANGTE

Naupangte: Nu-le-pa thumang lou i om uhia? Nu-le-pate zahtak lou i om uhia? Huchi bang mite Pathian in awilou ahi. Pathian in naupangte mohpuak poimoh penpen agen tuh "Nu-le-pa zahtak ding" chih ahi. Tulai khovel ah thil awlmohhuai tampi a-om hi: Sum-le-pai zonna, galdouna ah duty ding, khotang vai a sep-le-bawl ding leh a dangdang tampi a-om hi. Himahleh, naupangte a ding in zaw huaite tengteng sang mah in insung ah Nu-le-pate thu mangtak a i om ding tuh i mohpuak poimoh penpen ahi.

Deihthohtak naupangte aw! Thil tampi na kiang uah gen ut ka nei hi. Himahleh tampite lakah a poimoh diak teng ka hon gelh hi. Na heutute uh toh pangkhawm in hiai thil thum kigente ana zui teitei un aw!

Ka kipak

Sd/- REV M. GINMINTHANG
Child Co-ordinator, EBC




EBC Innsung Thu

NDPN TOH KISAI:

EBC in Missions nasepna toh kisai a pawldang toh i sephawmna a bik a, WEC leh SIM a kua hiam in Pathian sapna tang a kuan nuamte a ding in NDPN tungtawn a ngetna piaktheih ahi. Hiai toh kisai in Saptuam chih a local Pastorte tungtawn in thuchian kimzaw theihtheih ding ahihman in amau toh kithuzak theih ding hi. Huan, hiai a lutnuamte a ding in local Pastor recommendation leng poimoh ding hi. June kha sung tan a a utten Dorcas Hall ah Director of Missions address in min piaklut ding ahi. Thuchian kimzaw Dorcas Hall a Missions Department ah kantheih ding hi.

NDPN SEMINAR REPORT:

Khovel thil paidan kikheng zel ah, Pathian mission i sepkhiakdan leng kikheng zelding dinmun ah i omta hi. Missionary min pu a i septheihlounha mun hongtam hiai hiai ahihman in, Nekzonna Dohkan Pilpit Nasepna (NDPN) tungtawn a Pathian Mission sepkhiakna ding in kisinsakna mun tuamtuam ah, anuai a bang in lohchingtak in kinei hi.

1. April 19-20 in EBCC Guwahati ah, Dimapur, Diphu, Shillong leh Guwahati a kipan sepna neisa mi 55 leh sinlai naupang sepna zonglel 115 paikhawm in lohching leh manphatak in kizou hi.
2. April 24-27 sung EBCC Delhi ah, Chandigarh leh Delhi khopi a kipan Nurse 100, businessmen & self-employed mi 52, Government employees mi 83 leh student & career Aspirants mi 93, a gawm 328 tel in lohchingtak in kizou hi.
3. May 01, 2024 in CSI Women's House, Bangalore ah, Mumbai leh Bangalore akipan mi 81 hong paikhawm in seminar lohchingtak in kizou hi. 
4. May 03, 2024 in EBCC Aizawl, Dinthar ah Aizawl khopi a saptuam 3 omte a kipan tuailai 93 te toh lohchingtak in seminar kizou thei hi.
5. May 8-11, 2024 sung Gospel Centenary Hall pansan in Lamka North leh South Division a kipan, Government & Private nasem mi 129, khut nasem & bazar kai, 156, Summet bawl & Dawr kai, 65 leh University/college kai & sepna zonglel 277, a gawm mi 627 hongtel in lohching leh manphatak in seminar kizou hi.

Hiai seminar hunte ah sinsaktu in Rev Dr S Vung Minthang, GS, Dr Tonsing Samuel Mungpu leh Rev K Kamchinkhup, Director of Missions te pang uhi. Seminar hun tuamtuam a tel, a gawm in 1199 pha hi. Amaute kiang ah Bible in nasep a gendan leh nasepna mun theihpihtu nasepna toh kisai sinsakna piak hi uhi. Tunung a gah manpha Toupan hon muhsak lam-et ahi. Toupa'n thupina tang hen.

- Report petu:

Upa T Paukhansiam, *Missionns Coordinator* ■

Thu Tuamtuam

KIPAHTHU GENNA: EBCC Central Delhi ten Toupa gam, nasepna a ITNA MEISEL chih minvoh a Zodawn lam a i saptuamte huhna na bawlsek uh, tukum in DEC Singngat Divisionte deihsakna tungtawn in kou EBCC Lungthul E, Singngat Division in ka na sang/dong kha ua, ka kipak mahmah uhi. Pathian in petu Saptuam heutute khalam leh salam ah tampi in vualzawl hen chih ka thumna uh ahi.

- *Upa M Khamdoulia*n, Secretary, TBUC, EBCC Lungthul E.

KHALOH LAKMASAK PEN PIA: Unaupa Pastor Tualsonding Hangzo s/o (L) H Zamzakham in Indian Army a Pastor nna amuh, Toupa vualzawl na ahihdan phawk in a kha loh lak masak tengteng EBCC Moria Saptuam ah Toupa gam nasepna ding in hon pekhia hi. Saptuam in ettonhuai leh kipahhuai sa mahmah in hiai KTZ ah ka hon taklang uhi. Toupa'n a nasepna ah makaih in vualzawl hen chih ka thumna uh ahi.

- *Upa T Laljem*, Secretary, EBCC Moria

KIPAHTHU GENNA: We Care Centre Lamka, leh Centre Baptist Youth Fellowship, EBC in kithuahkhawm a Essential Training on Mental illness & Pastoral Psychotherapy Date 29 April - 04 May, 2024 sung Training Program asaina uah EBC Ministries Department nuai a semtu Pastor 5 leh CBYF nuai a kipan mi 5 agawm in EBC sunga kipan mi 10te, Experience leh Professional mahmah sinsaktute sinsakna nuai ah sawl a ka om na tung uah hamphatna a ngai in kipahhuai ka sapetmah uhi. Hiai hun a muhsuah tamloute:

Mundang gamlapipi a Sum leh pai tampipi seng a kuan khiakkiak ngailou a ei Inn mun mah a Ei mi (Pau i kibatpihte mah) Professional taktakte toh kisinsak thei dia i om hamphathuai petmah hi, abik in semtuteng bang a sep hunsung un Short Term Training aban pai zel ding uh alou theihlou bang a ngaih hilai leh ki-empower tuan mahmah ding ua muhsuah ahih kawmkawm in, hiai Trainingna a telkhaten kipahthu ko'n gen uhi.

Training a telte sik leh tangin

Sd/- Pastor V Nengzahau @ Haupi, EBCC Lanva ■



Kipahthu Genna THUMNA MAKAI

JUNE 2024

- 1 **KIGINNI:** June kha honpikai i biak Pathian kiang kipahtu gen ni. June 1-5 sung MELC Simveng in Olive Retreat Centre ah Tuailai Camp neiding a, Evan Lianding Guite thugenpi in pangding. Camp lohching ahihna ding in thumpih ni.
- 2 **NIPINI:** Zingchiang a kipan in GBC ah Spring semester kipan nawn ding, sinsaktu leh sintu naupangte thumpih ni. Pawl 10 leh 12 te result suak ah, tamtak in lohchinna ngah, Pathian kiang kipahtu gen in, tutunga lohchinna ngahnailoute a ding in thumpih ni.
- 3 **SEPPATNI:** Tukum apan NDPN nuai a, Coaching Career toh kisai in Delhi ah mi 10 chiang, UPSC (Civil Service) dinga kisakhawl nuamte a ding in, JS Mentoring Centre toh pangkhawm a omna ding leh nekding pia a etzui sawm ahi. Lohchingtak a sepsuah ahihna ding in thumna ah phawk ni.
- 4 **SEPNAWNNI:** June 5-7 sung VK Montessori school in Evangelistic Week zangdinga, Evan Lianding Guite thugenpi in pangding, thumna ah phawk ni.
- 5 **NILAINI:** Tuni CEC tutkhawm ni, manpha leh lohchingtak a meeting zoh ahihna ding in thumna ah phawk ni.
- 6 **NINGANI:** GBC in tuni leh zingchiang in student Revival Meet, nei ding ua Pastor S Khamkhanchin Ngaihte in hun zang ding. Date 7-8 in Faculty & Staff Retreat ORC Lamjang ah nei ding uh, thumna ah thei ni. Saptuam school ten Term-I ekzam zou in, June 8-19 sung Summer Break neiding uh. Suty sung manphatak a zanga, lutnawn hunding a buaina bangmah omlou a lutnawn chiat theiding in Toupa ompihna ngen in thumpih ni.
- 7 **SINTAWPNI:** June 7-9 sung EBCC Tanguam in Naupangte Ni leh chialpi kithuah in hun zangding a, Evan T Damkhotang in Pathian thutak gending, thumna ah phawk ni.
- 8 **KIGINNI:** June 9 BCD day ah Evan Lianding Guite in EBCC D Phailian ah hunzang ding a, June 8 & 9 in Rev K Kamchinkhup, Director of Missions in EBCC Bungmual ah Naupangte Ni zangin Pathian thutak gending. Pathian kha pawlna ngen in thumpih ni.
- 9 **NIPINI:** Naupangte Ni ahiehtoh kiton in Pathian kiang ah kipahtu gen in, tuni in Rev M Ginminthang, Child Coordinator in Zenhang Lamka a hun zang ding, Naupangte lak a Kha khanlohna thupi a tunna ding in thum ni.

10 SEPPATNI: Lametnamun (LRRC) ah damdawi hih zongsangte kepna paihoih theizel. Pathian kianga kipahthu gen in, kemtute leh kep a omte a ding in Toupa makaihna ngen in thum ni.

11 SEPNAWNNI: Olive Retreat Centre (ORC) ah Camp leh Inkuan a hunzang ding Toupan hon pezel, kipahthu genkawm in, Centre enkolture a ding in Pathian ompihna leh makaihna ngen in thumsak ni.

12 NILAINI: June 13-16 sung EBCC Teikhang in naupang camp neidinga, Evan Lianding Guite thugenpi in pangding, Khasiangthou pawlna leh makaihna ngen in thumpih ni.

13 NINGANI: June 14-24 sung Kanaan Zomi Christian Fellowship, Malaysia in Tuailai Nungzuihna Camp saiding a, Evan T Damkhothang thugenpi in pangding. Pathian Kha pawlna leh makaihna ngen in thumpih ni.

14 SINTAWPNI: Zingchiang June 15-16, EBCC Kolkata in Naupang Chialpina nei dinga, hiai hun ah Child Co-ordinator in thutak gen ding. Gamsung buaina ziakin damlou kepna nongkai mahmah hi. EBC Health Care Board in kikepna hoihtak omtheihna ding in panla lelel, thumna ah pawk ni.

15 KIGINNI: June 16 Pate Ni ah, Rev Dr S Vung Minthang, GS in EBCC Lamka Baptist Church, Hiangtam Lamka ah thugen ding a, Rev Thawndoulain, Director, Ministries in

EBCC Dinthar, Aizawl ah, Rev Nenglian Vualnam, Director, Development in EBCC Hiangtam Lamka leh Rev K Kamchinkhup, Director of Missions in EBCC College veng ah, Pathian Kha pawlna leh makaihna ngen in thumpih ni.

16 NIPINI: Tuni Pate Ni saptuam chih in manpha leh lohchingtak a zat ahihna ding leh Pate a ding bik in Pathian Kha vehna leh pawlna ngen in thum ni. Rev Gin Malsawm Principal GBC in EBCC Khominthang a hun zang ding thumpih ni.

17 SEPPATNI: NDPN sepsuahna toh kisai in tulel in Mission Inn, Khominthang ah Coaching kai leh laisim in tuailai 10 omlel uh, amauteh uh hon mualsuah ua, Khrist adia theihpihtu muanhuai honghihna ding un thumna ah pawk ni.


18 SEPNAWNNI: Zingchiang nitak a kipan in date 23 nitak tan daih ding EBCC D Leikot in Tuailai Camp nei ding uhi, hiai hun in thugentu ding Evan Elvis Nehlai hi ding, camp vaisaite a tel dingte Pathian ompihna toh manphatak a zat ahihtheihna ding in thumpih ni. Khopi Saptuam kemtu Pastor ten khalam leh salam damtheihna hoihtak toh saptuam hon etkol ua, hon kepezel theihna ding un thumpih ni.

19 NILAINI: June 20-23 sung EBCC Kanaan in naupang camp neiding a, Evan Lianding Guite in Pathian thutak gending, camp lohching ahihna ding in Pathian ompihna leh makaihna ngen in thumpih ni.

20 NINGANI: June 21-23 sung Mizoram Division Dorcas Khawmpi, EBCC Mimbung ah omding a, Nu Nemngaih mawi, Dorcas Co-ordinator in Pathian thutak gending. Khawmpi lohching leh gahsuah ahihna ding in thumna ah phawk ni.

21 SINTAWPNI: Pastor candidate mi 4 te mission exposure in Dhemaji mission field ah hunzang in omlel uh, manphatak a hong kizat ua, mission puakgik toh hongkik theihna ding un thumna ah phawk ni.

22 KIGINNI: Division thak nih behlapna ding toh kisai etkaina paizomzel, lohchingtak a sepsuah theih ahihna ding in thumna ah phawk ni.

23 NIPINI: School tungtawn  Pathian nna i sephawmna in masawnzal, kipahtu gen kawm in, naupangte, sinsaktute leh school managing committee te a ding in Pathian ompihna leh makaihna ngen in thum ni.

24 SEPPATNI: June 25-28 sung EBCC Pearsonmun in Naupang Camp neidinga, Evan Lianding Guite thugenpi hiding. Pathian makaihna ngen in thumna ah phawk ni.

25 SEPNAWNNI: Tualsung Saptuam chih a Missions Committee tungtawn in mimal missionary vakding Toupan hon behlapzel, vualzawl na i tante ziak in Pathian kiang kipahtu gen ni.

26 NILAINI: Tunitak in Tuailai Nipi Khawmpi EBCC Hiangtam Lamka in zang ding ua Mr. Thangbiaklal Valte MC in thugenna hun zang ding, thumpih ni. I gam buaina in venlam hon nawt theihna ding leh vaihawmten lungsim munkhat a, Pathian zahtak kawm a vai honsai theihzelna ding un thum ni.

27 NINGANI: Dorcas Hall, Divisions, Mission Fields leh Tualsung Saptuam chih a sumasai muanhuai leh gin-om mahmah Toupa'n honpiakte ziaka kipahtu gen in, amauten Pathian muanhuaina leh diktatna koppih a honsep zomzelna ding uah thumpih ni.

28 SINTAWPNI: Tuni apan date 30 tan daih ding EBCC Pethuel in, Upa Bial Khawmpi, nei ding ua Rev Gin Malsawm, Principal GBC thugentu in pang ding Pathian khasiangthou vehna leh makaihna ngen in thumpih ni.

29 KIGINNI: June 29-30 sung, EBC Centenary Hall, New-Lamka ah EBC Hq. saina in BCD sunga Intermediate & Seniorte telna ding in Evangelistic Meet neih hiding, hiai hunah Evan. Damkhothang leh Evan. Lianding Guite te'n thutak gen in, Child Co-ordinator leh a teamte makaihna in Biakna leh Phatna hun zat hiding.

30 NIPINI: OMF International leh WEC tungtawn a i tuailai missionary kuante ziak a kipahtu gen in, tamsem kuankhe thei ding in Pathian vualzawl na ngen in thum ni. ■

GBC A MTC SIN UTTE A DIA THEIHTUAK

Grace Bible College a Bible Galzilna, Ministerial Training Course (MTC) sin utte a ding in Admission kihong lel. Theihtuak:

1. Kingetna lai (Application Form) muhtheihna: College Office leh College website (www.gracebiblecollege.in) ah muhtheih ding
2. Bangteng Submit ding:
 - a). Application Form
 - b). Local Saptuam' recommendation
 - c). Course Fee: Rs. 3,000/- (Manipur pawlamte a ding in Rs. 3,500). EBC Saptuam Upa ordain hita, fee pezouloute a ding in, Director of Ministries, EBC kiangah ngetna a bawltheih ding.
3. Admission Last Date: June 28, 2024
4. Kum Bangzah Sin Ding: Kum Nih (2) sinding ahi, Lemtan louhna ziak a kum 2 sung a zouloute kum 1 behlaptheih ahi ding.
5. Mun gamla a omte a ding in Online in Admission bawltheih ding. Lai poimohte mtc@gracebiblecollege.in a khak ding leh Course fee Grace Bible College, A/C no: 11343702758; IFSC: SBIN0006182; Churachandpur Branch tungtawn in piaktheih ding a, himahleh piakna detail Co-ordinator 9856293506 theihsak ding ahi.

ADVERTISEMENT

EBCC Mission Compound in Saptuam Silver Jubilee Souvenir bawl sawm ua huai a ding in Article sapna (Advertisement) hiai a nuai a bang in bawl uhi. Tua bang penuamte'n thuchian kimzaw a nuai a contact number kipiate ah thuzak theih ding hi.

Article toh kisai hiai a nuai a bang in:-

1. Thumal bikhiah zah : 1500
2. Article piaklut theih hunsung ding : A kisuah apan 31st August, 2024 tan
3. Article pelutte theih ding : Min gelhdan diktak leh Passport size photo 1 toh piaklut ding
4. Piaklutna ding Whatsapp no.: 9862956938, 8413854140, 9774391907

Editorial board sik-le-tang in,

Sd/- (PASTOR G. THANGROSIAM)
Jt. Editor

Postal Regd. No. MNP 07 | Regd. No. 22344/70

BOOKPOST

If undelivered, please return to

The Editor,
KCHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



Edited & Published by Rev. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006